

HEBREU AG MỸ CARTA

Topě kósin

¹ Topě vỹ vāsỹ ěg jóg'jóg ve ag mré vēmén (ka)mě ja nĩgtĩ. Ag mỹ tóg tó mǎn', tó mǎn', he ja nĩgtĩ. Ti vỹ tó tĩ ag mỹ tóg tó ja nĩgtĩ, vāsỹ, ag tỹ věnh kar mỹ ti vỹ kāmén jé. ² Ūri tóg kakó tĩ ha, kurā tỹ ěgno ti, kỹ tóg ūri ā kósin jěně, ti tỹ ěg mỹ Topě vỹ tó jé. Ti mré tóg nén ũ kar hyn han ja nĩgtĩ, Topě ti, ā kósin mré. Kỹ tóg ti mỹ nén ũ kar tag vin ke mũ gé. Ti hã mỹ tóg vin sór mũ, Topě ti, ā tũ kar ěn ti. ³ Ěg tỹ Topě kósin ve kỹ ěg tóg Topě tỹ tỹ ũn mág nĩ ki kanhró nỹtĩ. Ti ri ke pě ti nĩ, ti hã pě, tỹ ti Topě hã ve nĩ, ti kósin ti. Ti vỹ vỹ tar nĩ, tỹ tóg ěg tỹ nén kar vэг mũ tag ki rĩr tĩ, ā vỹ tỹ. Ti hã vỹ ěg tỹ Topě vỹ mranh ěn tỹ tũg' he tĩ, kỹ tóg ěg jãnhkrig kỹ ěg fěg ke mũ. Ěg jagfy ter kar kỹ tóg Topě pějja tá nĩ nĩ, ũn tỹ věnh kar tar kǎfór nĩ ěn pějja tá, ti kósin ti.

Topě kósin tỹ Topě tỹ jěgně jafã ag kǎfór nĩ

⁴ Topě kósin vỹ Topě tỹ jěgně jafã ag kǎfór nĩ, kanhkã tǎn ag. Ti jiji vỹ ag jygjy kǎfór nĩ gé. Hã kỹ ěg tóg vэг tĩ, ti tỹ ag kǎfór nĩ ti. ⁵ Topě pi(jé) ā tỹ jěně jafã ag kã ũ mỹ: “inh kósin vỹ tỹ ā nĩ,” he ja nĩgtĩ'. “Ūri hã sóg ā mỹ: tỹ inh ā panh nĩ, he mũ,” he ja tũ ti nĩ, Topě ti, ā tỹ jěgně jafã ag kã ũ mỹ. Kỹ tóg ag kã ũ to: “ti panh vỹ tỹ inh nĩnh mũ, kỹ tóg tỹ inh kósin nĩnh mũ,” he ja tũ nĩ gé. Ā kósin hã to tóg tag tó ja nĩ, Topě ti.

⁶ Ā kósin ve ěn jĕnĕ ja ti nĭ, ěg to, Topĕ ti. Ā tỹ ti jĕnĕn kỹ tóg tag tó gé, ha mĕ: “isỹ jĕgnĕ jafã ag vỹ ti krĕm mũg ke kãn mũ, ha vemnĭ,” he ja ti nĭ, Topĕ ti.

⁷ Hã ra ti tỹ jĕgnĕ jafã ag to vĕnh jykre tag tóg rán kỹ nĭ, ha mĕ: “Topĕ vỹ Ā tỹ jĕgnĕ jafã ag tỹ kãka ri ke han, kỹ tóg ag tỹ pĩ gru ri ke han mũ gé, Topĕ ti,” he tóg mũ gé, Topĕ vỹ rán ki, kanhkã tân ag to.

⁸ Kỹ tóg Ā kósin mỹ tag tó, ha mĕ: “Topĕ vỹ tỹ Ā nĭ. Ā tỹ tỹ pã'i mág nĭ vỹ tũg' henh ke tũ pĕ nĭ. Vĕnh jykre kuryj han Ā tĩ, Ā krĕm ke kar ag mỹ. ⁹ Vĕnh jykre kuryj to Ā há nĭ. Vĕnh jykre pãno to Ā jũ nĭ. Hã kỹ sóg Ā kuprĕg, isỹ tỹ Topĕ nĭn kỹ, isỹ tỹ Ā pã'i nĭn kỹ. Ā tỹ sóg ũn mág han, Ā krĕm ke kar ag kãfór Ā tóg nĭ. Ā tỹ tỹ pã'i mág nĭ tugrĭn Ā fe tóg mrin kenh ke mũ, vĕnh kar fe tỹ mrin ke kãfór,” he ja tóg nĭ gé, Topĕ ti, Ā kósin ti mỹ.

¹⁰ Kỹ tóg ti mỹ tag tó gé, ha mĕ: “ěg tỹ nĕn (ũ) kar han ve ki Ā tóg ga han, kanhkã ti ke gé, Ā nĭgé tỹ.

¹¹ Tũg' he kãn jé tóg ke mũ, Ā tỹ nĕn han ja tag ti, jãvo Ā hã tóg tũg' henh ke tũ pĕ nĭ. Ā tỹ nĕn han ja tóg Ā sinsin kỹ kugnãnh ke mũ, kur ri ke. ¹² Ti kãnhpĕn jé Ā tóg (ke) mũ, ěg tỹ kur kónhpĕn ri ke. ěg kur kunũg ěg tĩ, ěg tỹ ũ kãra rãg jé. Tag ri ke han jé Ā tóg ke mũ, Ā tỹ han ja kar tag ti tỹ, Ā tỹn kókén kỹ. Hã ra Ā hã tóg tũg' henh ke tũ nĭ. Sin ke tũ pĕ Ā tóg nĭ jãvo, kófãn ke tũ pĕ a tóg nĭ jãvo,” he ja tóg nĭ, Topĕ ti, Ā kósin ti mỹ.

¹³ Hã ra Topĕ pi(jé) Ā tỹ jĕgnĕ jafã ag mỹ: “inh pĕgja tá nĭ,” he ja nĭ'. “Nĭ ra ver, inh pĕgja tá, sỹ Ā kato vỹ mũ ag tỹ Ā krĕm vin jé, kỹ ag se vĕ sir,” he ja tũ ti nĭ, ti tỹ jĕgnĕ jafã ag mỹ. Ā kósin hã mỹ tóg tag tó. ¹⁴ Topĕ tỹ jĕgnĕ jafã ag vỹ vĕnh kuprĭg ri ke

nýtĩ, hã ra ag tóg Topẽ rãnrãj ti han tĩ. Topẽ vỹ ag jẽgnẽg tĩ, ag tỹ ti tũ ag jy nĩgãn jé, ùn krenkren ke mũ ãn ag jy.

2

Ëg tỹ Topẽ vĩ to é henh ke tũ

¹ Hã kỹ tóg há tĩ, ãg tỹ ti vĩ mẽ kỹ ti jykre hã han kỹ, ãg tỹ tỹ prãnh ke tũ nĩ jé. ² Topẽ tỹ jẽgnẽ jafã ag vỹ vãsỹ Topẽ vĩ ma kãmũ ja nĩgtĩ. Hã ra ag tóg ki hã tó ja nĩgtĩ. Û tỹ ag vĩ ki krov tũ ãn vóg kónãn ja ti nĩgtĩ, Topẽ ti. “Û tỹ ag vĩ mẽ sór tũ ãn ag vóg kónãn jé sóg ke mũ,” he ja ti nĩ, hã kỹ tóg hã ra ke ja nĩgtĩ. ³ Kỹ ãg tóg ùri kren ke tũ nĩ gé, ãg tỹ ti to é hen kỹ, ti tỹ ãg kren han sór mũ ra. Nén ù mág pẽ vẽ mỹr, Topẽ tỹ ãg krenkren han sór mũ tag ti. Ëg pã'i vỹ ã mré mũ tĩ ag mỹ tó vén, ti tỹ ãg kren han sór mũ tag ti. Û tỹ ti vĩ mẽg mũ ag vỹ ãg mỹ tó ja nĩgtĩ gé, ti tỹ ãg kren han sór tag ti, hã kỹ ãg tóg ki kanhró nýtĩ ha. ⁴ Kỹ Topẽ vỹ ù tỹ ãg mỹ ti vĩ tó mũ ãn ag vĩ to: “há ti nĩ,” he ja nĩ gé, hã kỹ tóg ag tar han, ag tỹ ãg tỹ nén ù han vãnh ãn hyn han jé, milagre ti, ãg tỹ vėsóg ki nén han ki kagtĩg ãn. Tag to ag tar nýtĩ, Topẽ tỹ ag tãn kỹ, ù tỹ ti vĩ tó tĩ ag. Kỹ tóg ag mỹ ã kuprĩg jẽnẽ gé. Ti hã ne to jykrén kỹ: “tag tar han jé sóg ke mũ, ãn to, kỹ sóg ù ãn tar han ke mũ, ù ù to,” he ja nĩ, ti vĩ tó tĩ ag to, Topẽ ti.

Topẽ kósin tỹ ãg tỹ ùn mág han ke

⁵ Topẽ vỹ nén (ũ) kar ãn han mãn ke mũ, kỹ tóg tỹ ù tãg nýtĩnh mũ. ãn kri pã'i vỹ tỹ ãg nýtĩnh mũ, ãg tỹ tỹ ãprã ke nýtĩ ra. Ti tỹ jẽgnẽ jafã ag pi(jé) tỹ ga tãg kri pã'i nýtĩnh mũ'. ⁶ Hã kỹ ti vĩ tó tĩ ù vỹ tag rán ja

nĩ, ti vĩ rán ki, ha mẽ. Topẽ mỹ tóg: “tỹ ãg tóg nén ù tũ nỹtĩ vê, ãg tỹ tỹ ãprã ke nỹtĩn kỹ, hã ra ã tóg ãg hã mĩ ãkren kỹ nĩ nĩ,” he ja nĩ. “Tỹ ãg tóg nén ù tũ nỹtĩ vê, ãg tỹ tỹ ãprã ke krẽ nỹtĩn kỹ, hã ra ã tóg ãg ki rĩr tĩ. ⁷ Kỹ ã tóg prỹg pipir ki ã tóg ãg tỹ ùn kãsir han ja nĩ, kỹ ãg tóg ãn kã ã tỹ jẽgnẽ jafã ag krẽm nỹtĩ. Tag pãte ã tóg ãg tỹ ùn mág han ke mũ, ùn tar, pã'i mág tỹ ùn há nĩ ãn ri ke, ãg tỹ vẽn h kar kri nỹtĩ jé. ⁸ Kỹ ã tóg ãg krẽm nén (ũ) kar vin kãn ke mũ,” he ja tóg nĩ, Topẽ mỹ, Topẽ vĩ tó tĩ ti.

Ha vé, Topẽ vỹ ãg krẽm nén (ũ) kar vin ja nĩ, ãg tỹ tỹ nén (ũ) kar pã'i nỹtĩ jé. Kỹ nén (ũ) kar vỹ ãg krẽm nỹtĩ. ãg krẽm nỹtĩ tũ vỹ tũ tĩ. Hã ra ãg tóg ver vэг tũ nĩgtĩ, nén (ũ) kar tỹ ãg krẽm nỹtĩ ti. Ver tóg nén ù ù tỹ ãg tũ tũ nỹtĩ ven nĩ. ⁹ Hã ra ãg tóg Jesus hã tỹ tỹ ùn mág nĩ ãn vэг tĩ, ùri, ti tỹ tỹ ùn há nĩ ãn, pã'i mág ri ke. Prỹg pipir ki Jesus tóg Topẽ tỹ jẽgnẽ jafã ãn ag krẽm ke ja nĩ, kanhkã tãn ãn ag krẽm, kỹ tóg ãg kar jagfy ter ja nĩ, Topẽ tỹ ãg jagãgtãn kỹ. Kỹ tóg ùri tỹ ùn mág pẽ nĩ nĩ, ti tỹ ãg jagfy ter ja ãn tugrĩn.

¹⁰ Topẽ vỹ tỹ nén (ũ) kar kri ke nĩ, kỹ nén (ũ) kar vỹ ti tugrĩn rĩnrĩr nỹtĩ. Hã kỹ tóg vẽn hmỹ tũ nĩ, Topẽ tỹ Jesus mỹ: “ã jagtar tugrĩn ã tóg tỹ ùn há tãvĩ nĩnh mũ,” hen kỹ. Hã jé Jesus tóg jagtar nĩ ja nĩgtĩ, ti tỹ tỹ ùn há tãvĩ nĩn jé. Kỹ tóg ùn e krenkren han mũ sir. ãg jo tóg tĩg mũ sir, Topẽ krẽ kar ag jo, ãg tỹ ti ri ke há nỹtĩ jé gé, ãg tỹ Topẽ jamã sĩnvĩ ãn tá junjun jé, ti mré.

¹¹ Ha vé, Jesus vỹ ãg tar han tĩ, ãg tỹ Topẽ vỹ mranh mãn sór tũ nĩ jé. Kỹ ù tỹ ãg tar han mũ vỹ ãg mré jóg pir nĩ, Jesus ti. Hã kỹ tóg ãg to: “inh jãvy ag, inh ve fag,” he mũ. ãg to tóg mỹ'ãg tũ nĩ. ¹² ãg

to tóg: “inh jãvy ag mÿ sóg ã jiji tónh ke mÿ, jóg,” he ja nÿ. “Ag rÿnve sóg ã tÿ tÿ ùn há nÿ ãn kãmén ke mÿ, ã jé tó jé sóg ke mÿ, ag to sóg mÿ'ãg ke tÿ nÿ,” he ja tóg nÿ, Jesus ti, ãg to. ¹³ Kÿ tóg: “Topê ki sóg rã kÿ jê,” he mÿ gé. Kÿ tóg: “inh mré ke ag hã vê, Topê tÿ inh mÿ ùn vin mÿ ag kar hã vê, fag ke gé,” he ja nÿ gé.

¹⁴ Jesus mré ke ãn ag hã vÿ tÿ ãprã ke ag nÿtÿ, fag ke gé. Hã kÿ Jesus vÿ ag mré ke tÿ ãprã ke nÿ ja nÿ gé, hã kÿ tóg ãg jagfy ter ja nÿ. Ti tÿ Japo tÿg ke vê, ã ter tugrÿn. Japo vÿ ãg tén sór to tar nÿ, hã ra Jesus vÿ ti tÿ tÿ' henh ke mÿ. ¹⁵ Kÿ tóg ãg krenkren han ke mÿ, ãg tÿ ãg ter ke kamëgmëg kÿ. ãg ter ke tugrÿn ãg tóg nén (ÿ) tÿ ãg tén ke mÿ kar kamëg tÿ, nén (ÿ) tÿ ãg vóg kónãn tÿ kar ke gé. Hã ra Jesus tóg ãg krenkren han mÿ, kÿ ãg tóg nén ÿ kamëg mãn ke tÿ nÿ ha. ¹⁶ Ti pi(jé) Topê tÿ jëgnê jafã ag krenkren han mÿ', kanhkã tãn ag'. Abraão krê ag hã krenkren han tóg mÿ, ag jóg mré hã, hã kÿ tóg rán kÿ nÿ. ¹⁷ Hã jé tóg ã jãvy ag ri ke nÿ ja nÿgtÿ, Jesus ti. Tÿ tóg ãg hã pã ja nÿgtÿ. ãg tÿ nén (ÿ) kar han mÿ ve kãn ja ti nÿgtÿ, ãg jagtar mré hã. Hã kÿ tóg ãg jagfy vënh fëg, kÿ tóg ãg tÿ Topê vÿ mranh tÿ tÿ' he ja nÿ. Topê tÿ ki rÿr tÿ to pã'i mág tÿ vënh rãnrãj han mÿ ãn ri ke han ja ti nÿ, Jesus ti. Ti tÿ ãg jagfy Topê tÿ ki rÿr nÿn kÿ tóg ãg jagãgtãn tÿ. Ki rÿr há han tóg tÿ gé, ti tÿ ãg mré tÿ ãprã ke ja nÿn kÿ. ¹⁸ ãg mré tóg jagtar ja nÿgtÿ, Jesus ti. Japo vÿ ti tÿ Topê vÿ mranh han sór ja nÿgtÿ gé, ãg ri ke, hã ra tóg mranh ja tÿ nÿ inhhã. Hã kÿ tóg ki kanhró nÿ, ãg tÿ nén (ÿ) vég mÿ kar ki. Hã kÿ tóg tag kar to ãg tar han ki kanhró nÿ inhhã.

Jesus tỹ tỹ Moisés kri ke nĩ

¹ Inh kanhkã', Topẽ tũ vỹ tỹ ãjag nỹtĩ. Kỹ tóg ãjag kuprêg, ãjag tỹ kanhkã tá ve jé. Hã kỹ Jesus mĩ êkrén nĩ. Topẽ vỹ ti fêg. Kỹ tóg êg mỹ Topẽ tũ ki rĩr tĩ to pã'i mág ên ri ke nĩ, êg tỹ ti ki rã kỹ. Ti hã kãmén êg tóg tĩ gé. ² Û tỹ ti fêg mũ ên rãnrãj han tóg tĩ, Moisés ri ke. Moisés vỹ Topẽ tũ kar ki rĩr há han ja nĩgtĩ gé, Topẽ povo kar ki, ti ãn krêm ke kar fag ki. ³ Hã ra Jesus vỹ Moisés kãfór nĩ. Û tỹ ãn han tĩ vỹ ù tỹ ãn ki rĩr tĩ ên kãfór nĩ. Ri ke ti nĩ, Jesus tỹ Moisés kãfór nĩ ti. Êprã ke vỹ tỹ ti nĩ, Moisés ti, kỹ Jesus vỹ ti kãfór nĩ. ⁴ Gĩr kar vỹ panh nỹtĩ gé. Û tỹ vênh kar han mũ vỹ tỹ Topẽ ti nĩ. ⁵ Moisés vỹ Topẽ tũ ag ki rĩr ja nĩgtĩ, kỹ tóg ki rĩr há han ja nĩgtĩ. Topẽ camarada vỹ tỹ ti nĩ ja nĩgtĩ, kỹ tóg Topẽ ãn krêm ke fag ki rĩr nĩ ja nĩgtĩ. Hã ra tóg Cristo tỹ nén han ke ên kãmén ja nĩ gé, Moisés ti. ⁶ Cristo vỹ tỹ Topẽ kósin nĩ, kỹ tóg Topẽ tũ ag ki rĩr há han tĩ, hã ra ag tóg tỹ ti tũ nỹtĩ, ti ãn krêm ke kar ên ag, ã tỹ ãn ki rĩr tĩ ag, fag ke gé. Êg hã vê, ti tũ vỹ tỹ êg nỹtĩ, ti ãn krêm ke vỹ tỹ êg nỹtĩ, êg tỹ ti to tar nỹtĩn kỹ, êg tỹ ti kãmén há han kỹ, ti tỹ êg mỹ sér nĩn kỹ, êg tỹ tá nén venh ke ti.

Êg tỹ vênhkán ke

⁷ Tag tó tóg mũ, Topẽ ti, ã kuprĩg tỹ, ha mẽ: “Ãjag tỹ ùri inh vĩ mẽ kỹ vênh kutu han tũg nĩ,” he tóg. ⁸ “Ãjag jóg|jóg ve ag vỹ vênh kutu han ja nĩgtĩ, kỹ ag tóg inh kato vãsã ja nĩgtĩ, ag tỹ ga kórég ki nỹtĩn kỹ,” he tóg, Topẽ ti. ⁹ “En kã ag tóg iso vĩ pãtigtén ja nĩgtĩ gé. “Êg tỹ ti vĩ mranh mũ ra tóg êg vóg konãn ke tũ nĩ,” he ja ag tóg nĩgtĩ, ag tỹ isỹ nén han mũ ên

ve ja ra, isy pryg ty 40 (ke) en ki ag ki rir ha han mu ra. ¹⁰ Ha ky sog ag to ju ja ni. Ag to sog: "koreg ag nytĩ," he. "Venh jykre ha to jykren tu ag tog nytĩgtĩ," he sog. "Inh japry ve sor ja tu ag tog nytĩ, inh jamĩn ti," he sog. ¹¹ Ky sog ag to ju nin ky (sog) ag to vi ju han ky tag to, ha me. "Sy ag venhkán han ke ve ve, ha ra ag tog iso vi ju han ja ni, ha ky ag tog venhkán han ke tu ni ha. Ha ky ag ri ke han tug ni, ajag ty uri inh vi me ky, he sog mu," he tog, Topē ti.

¹² Inh kanhkā, tag to jykren, ajag ty Topē kato vāsān sor tu ni je, ajag ty ti vi mranh sor tu ni je gé, ajag ty Topē tovānh sor tu ni je. Ti ha ne eg ririr han ki kanhró ni', Topē ti. Ha ky ti tovānh tug ni. ¹³ Jagnē jyvēn ni, kurā kar ki, uri mȳr. Ajag ty jagnē jyvēn to tar nytĩn ky ajag tog Topē to tar nytĩnh ke mu gé, ha vemni, ky ajag kāmĩ ũ vȳ venh kutu han ke tu ni. Eg ty ti vi mranh ky eg tog kutu nytĩ, ha me, ti vi mranh ty eg mȳ sinvĩ nin ky. ¹⁴ Ha me, Cristo tu vȳ ty eg nytĩ, eg ty ti tovānh sor tu nytĩn ky. Eg ty ti ki rā ve kā eg tog ti to tar nytĩ ja nĩgtĩ. Eg ty en ri ke ti to tar nytĩn ky eg tog ty ti tu nytĩ. ¹⁵ Ha ky tog eg mȳ: "ajag ty uri inh vi me ky venh kutu han tug ni," he mu. Ajag jóg'jóg ve ag vȳ tog venh kutu hyn han' he ja nĩgtĩ, ky ag tog inh kato vāsānsān, isy ag jykre ve sor ja nin ky. Ag ri ke han sor tug ni," he tog mu eg mȳ. ¹⁶ ũ ty hē nȳ hȳn ti vi me ky ti kato vāsānsān ja nĩgtĩ? ũ ty ga ty Egito tá kā pa ja en ag hā ja ve, ha me, Moisés ty tá ag tatĩn kātĩg ky. ¹⁷ Ky Topē hȳn ũ ty hē to ju ja nĩgtĩ, pryg ty 40 (ke) en ki? ũ ty ti vi mranh ja en ag hā to tog ju ja ni, hā ky ag tog ga koreg en ki tu' he kán. ¹⁸ Ky Topē hȳn ũ ty hē

to: “vėnhkán ke tũ ag nýtĩ ha,” he ja nĩgtĩ? Ū tỹ ti vĩ han sór tũ ěn ag to ke ja vė, mȳr, ha mẽ. ¹⁹ Ag tỹ ti tovānh kȳ, hã kȳ ag tóg ag tỹ nén ve sór ja ěn ve ja tũ nĩ sir, mȳr, ha mẽ.

4

¹ Topě vỹ ěg mȳ tag tó ja nĩgtĩ gé. Ti tỹ ěg vėnhkán han sór vė, kȳ ti vĩ to é he tũg nĩ. Vėnh ki rĩr há han nĩ, ājag tỹ to krónh ke tũ nĩn jé. ² Mě ěg huri, Topě tỹ ěg mȳ nén han sór mũ ěn ti, ũ tỹ ga kórég mĩ mũ ěn ag tỹ mẽ ri ke han ěg tóg huri. Hã ra ag tóg véké mẽ ja nĩgtĩ, kri fi ja tũ ag nýtĩgtĩ, ag tỹ mēg mũ ra. Hã kȳ tóg ag mȳ nén ũ há han ja tũ nĩ, Topě vĩ ti. ³ ěg tỹ ti ki ge hã kȳ ěg tóg vėnhkánkán ke mũ. Hã kȳ Topě vỹ tag tó, ha mẽ: “ag to jũ nĩn kȳ sóg ag to vĩ jũ han kȳ tag tó, ha mẽ. “Sỹ ag vėnhkán han ke vė vė, hã ra ag tóg vėnhkán ke tũ nýtĩ ha,” he ja ti nĩ. Topě vỹ vāsỹ vėnhkán ja nĩgtĩ, ti tỹ nén (ũ) kar pě han han ti kȳ. Kȳ nén (ũ) kar vỹ hyn han kȳ nýtĩ ha. ⁴ Hã kȳ kurã tỹ 7 (ke) ěn to tag tóg rán kȳ nĩ, ha mẽ. Topě tỹ nén kar hyn han kãn ja to tag tóg rán kȳ nĩ, ha mẽ: “kurã tỹ 7 (ke) ki Topě vỹ vėnhkán, ā rānrhāj han kãn kȳ,” he tóg mũ, Topě vĩ rán ki. ⁵ Hã ra tóg Israel ũ ag to tag tó ja nĩ gé, hã vỹ: “kȳ ag tóg vėnhkánkán ke tũ nýtĩ ha,” he mũ gé. ⁶ Hã kȳ ũ ag tóg vėnhkánkán ke mũ. Vāsỹ Topě tóg ěg jóg'jóg ve ag mȳ ag vėnhkánkán ke tag tó ja nĩgtĩ vė, hã ra ag tóg ti vĩ jēmě ja tũ nĩgtĩ, hã kȳ ag tóg vėnhkánkán ke tũ nýtĩ ha. Kȳ Topě tóg ũ ag kuprėg ja nĩgtĩ, kȳ tóg ag hã mȳ ag vėnhkánkán ke ti nĩm mũ sir, ěg hã mȳ. ⁷ Kurã tãg nĩm ja ti nĩ gé, ěg vėnhkán ke to, hã vỹ: “ũri,” he mũ. Hã kȳ Davi tóg kurã tãg tag to tag rán

ja nĩ, ha mẽ. Ag tỹ ga kórég ěn tá kãpa kar kỹ, ag tỹ ga há tá junjun kar kỹ Davi tóg tag rán ja nĩ gé, ha mẽ: “ãjag tỹ ũri ti vĩ mẽ kỹ vẽn kutu han tũg nĩ,” he ja tóg nĩ. Kurã tãg to ken hã vẽn.

⁸ Josué vỹ Israel ag mré ga há ěn ra tĩg ja nĩgtĩ. Hã ra ag tóg tá vẽnkhán pẽ han ja tũ nĩgtĩ ver, hã kỹ Davi vỹ ag mỹ kurã ũ tó ja nĩ, ag vẽnkhán pẽ han ke ěn ti tó ja ti nĩgtĩ. ⁹ Ha mẽ, Topẽ povo vỹ vẽnkhán ke mũ, ha vemnĩ, ti tỹ ag mỹ kurã nĩv ki. ¹⁰ ũ tỹ vẽnkhán pẽ ěn vég mũ vỹ ã rãnrãj ki vẽnkhán ke mũ, Topẽ tỹ ã rãnrãj ki vẽnkhán mũ ěn ri ke, kurã tỹ 7 (ke) ěn ki. ¹¹ Hã kỹ vãsãnsãn, ãjag tỹ tỹ prãnh ke tũ nĩ jé, ãjag tỹ ga kórég kri mũ ja ěn ag nón ti vĩ mranh tũ nĩ jé, ãjag tỹ ãjag vẽnkhán ke ěn ve jé.

¹² Topẽ vĩ hã tũgrĩn ěg tóg rĩnrĩr nỹtĩ. ã vĩ hã tỹ tóg nén kar hyn han tĩ. Rógro jã régre vỹ nén (ũ) kym há nỹgtĩ. Hã ra Topẽ vĩ vỹ ti tỹ nén (ũ) kym há kãfór han tĩ, kỹ ti vĩ tóg ěg kãra rã tĩ, ěg nĩ ti kãra, ěg kukã ti kãra ke gé, ěg krĩ ti kãra ke gé, ěg kuprĩg ti kãra tóg rã tĩ gé. Kỹ tóg ěg tỹ nén (ũ) to jykrén mũ kar ki kanhró nĩ, ěg tỹ nén (ũ) han sór mũ ki kanhró kar ti nĩ gé, Topẽ ti. ¹³ Nén (ũ) kar ki kanhró tóg nĩ, Topẽ ti, ã tỹ nén han mũ kar ki kanhró tóg nĩ. Nén ũ tóg ti mỹ vẽn pēju kỹ nĩ tũ pẽ nĩ. ũ tóg ti vatánh tá nén ũ han ke tũ pẽ nĩ gé. Ki kanhró kar ti nĩ, ũ tỹ ěg jykre tũgnỹm ke mũ ěn ti.

Jesus tỹ ěg jagfy vĩnh ke

¹⁴ Ti to tar nỹtĩmnĩ, ha mẽ. Ti ki rã kỹ ãjag nỹtĩ, kỹ ti to tar nỹtĩmnĩ. ěg jagfy Topẽ tũ ki rĩr tĩ to pã'i mág vỹ nĩ nĩ, hã vỹ: Jesus, he mũ, Topẽ kósin, he mũ. ěn vỹ kanhkã tá jun huri. ¹⁵ Ti pi(jé) ěg krój nỹtĩ tag ki

kagtĩg nĩ'. Ki kanhró tóg nĩ mÿr. Ęg ri kén tóg jagtar nĩ ja nĩgtĩ gé, kÿ Japo vÿ ti tÿ Topẽ vĩ mranh han sór ja nĩgtĩ gé, hã ra tóg inhhã mranh ja tũ nĩgtĩ. ¹⁶ Hã kÿ Ęg tóg Topẽ mré vēmén ke mũ, jatun mÿ. Mũmẽg vãnh nÿtĩ jé Ęg tóg ke mũ. Ęg jagãgtãn jé tóg ke mũ, Topẽ ti, kÿ tóg Ęg tar han ke mũ gé, Ęg krój nÿtĩn kÿ.

5

¹ Ęprã ke tÿ Topẽ tũ ki rĩr tĩ to pã'i mág jykre vÿ ge nÿgtĩ, ha mẽ. Ā mré ke ag jagfy tóg vĩ tĩ, Topẽ mré, kÿ tóg ag jagfy Topẽ mÿ nén ù pũn tĩ gé, kÿ tóg ag mẽg tãnh kÿ pũn tĩ gé, ag tÿ Topẽ vĩ mranh ja tugrĩn. ² Hã ra tóg tÿ Ęprã ke nĩ gé, ag mré, ag krój ri ke tóg nĩ gé, hã kÿ tóg ag krój nÿtĩ ra ag jagãgtãn há han tĩ, ù tÿ Topẽ vĩ mranh sór tũ ra mranh mũ ěn ag. ³ Mranh tóg tĩ gé, Topẽ tũ ki rĩr tĩ to pã'i mág ěn ti, hã kÿ tóg ã tÿ mranh mũ ěn to Topẽ mÿ tãnh kÿ pũn tĩ gé, ã mré ke ag tũ ěn mré. ⁴ Hã ra tóg vēsō: “inh hÿn Topẽ tũ ki rĩr sór mũ, kÿ inh hÿn tÿ tag to pã'i mág nĩnh mũ,” henh ke tũ pẽ nĩ. Topẽ hã ne ù to: “isũ ki rĩr tĩ to pã'i mág vÿ tÿ ã nĩnh mũ,” he tĩ', ti tÿ vãsÿ Arão kuprẽg vèn ěn ri ke.

⁵ Hã kÿ Cristo vÿ vēsóg ki tag to jykrén ja tũ nĩ gé. Ti pi(jé) vēsÿ pã'i han ja nĩgtĩ', vēsÿ Topẽ tũ ki rĩr tĩ ěn to pã'i mág han sór ja tũ tóg nĩgtĩ'. Topẽ hã ne ti mÿ: “inh kósin vÿ tÿ ã nĩ,” he ja nĩ'. “Ûri sóg ã mÿ: tÿ inh ã panh nĩ, he mũ,” he ja ti nĩ, Topẽ ti, Jesus mÿ. ⁶ Kÿ tóg ti mÿ tag tó gé, kÿ tóg rán kÿ nĩ gé, Topẽ vĩ tÿ rán kÿ nĩ ki, ha mẽ: “isũ ki rĩr jé ã tóg ke mũ. Tũ' henh ke tũ ti nĩnh mũ, ã tÿ isũ ki rĩr nĩ ti, Melquisedeque tÿ isũ ki rĩr mũ ěn ri ke,” he ja ti nĩ gé, Cristo mÿ, Topẽ ti.

⁷ Jesus vỹ, ã tỹ ga mĩ tĩg kỹ jagtar nĩn kỹ (tóg) Topẽ mỹ to vĩ', to vĩ' he ja nĩgtĩ, ti tỹ ti kren han jé, ti ter tũ nĩ jé. Kỹ tóg fỹ gé, Topẽ mré vēmén kỹ. Vēsỹrénh jagy han tóg. Kỹ Topẽ vỹ ti vỹ jēmẽ ja nĩ, Jesus tỹ ti mỹ to vĩn kỹ. Topẽ mỹ tóg tỹ ùn há nĩ, Jesus ti, hã kỹ tóg ti vỹ jēmẽ ja nĩ. ⁸ Topẽ kósin vỹ tỹ ti nĩ, Jesus ti, hã ra tóg ã jagtar tigrĩn (tóg) Topẽ tỹ nén tó mũ ki kanhrãn kãn ja nĩ, ti tỹ Topẽ vỹ hã han jé. ⁹ Ti tỹ vėnh kanhrãn kãn kỹ tóg ẽg kren pẽ han ki kanhró nĩ ge sir. Ẽg jagfy tóg ter ja nĩ, kỹ tóg ẽg kren han mũ, ẽg tỹ ti vỹ ki króm kỹ. ¹⁰ Topẽ vỹ ti mỹ: “inh mỹ isũ ag ki rĩrmnĩ, to pã'i mág vỹ tỹ ã nĩ, Melquisedeque ẽn ri ke,” he ja nĩ. Hã kỹ tóg tỹ pa'i nĩ, Jesus ti.

Ẽg tỹ ti to krónh kenh ke tũ

¹¹ Sỹ ãjag mỹ tag kãmén kãn sór mũ ra tóg jagy tĩ. Tó jagy ti tĩ, tag ti. Kỹ ãjag tóg mẽ há han tũ nĩgtĩ gé. ãjag pi(jé) krĩ há nỹtĩ ver'. ¹² ãjag tỹ ù ag kanhrãn ke vė vė, ãjag tỹ vãsỹ Topẽ vỹ mẽ ja nỹtĩn kỹ. Hã ra ãjag tóg ver ki kagtĩg nỹtĩ. ãjag kã ù tỹ ãjag mỹ Jesus kãmén vén ẽn tó mãn kỹ tóg há nỹnh mũ vė. Gĩr kãsir ri ke ãjag nỹtĩ. Gĩr kãsir ag vỹ leite hã kron tĩ, ãjag tỹ ver kãsir nỹtĩn kỹ. ¹³ Jãvo ùn sanh ag hã vỹ vėjėn kufy ko tĩ'. Gĩr tỹ leite kron mũ ri ke ãjag nỹtĩ, ãjag tỹ Jesus kãme ẽn ki kanhrãn kãn tũ nỹtĩn kỹ ver. ¹⁴ Û tỹ to jykrén há han mũ ẽn vỹ ùn sanh há ri ke nĩ, kỹ tóg ki kanhró nĩ. “Tag vỹ há nĩ, tag vỹ há tũ nĩ, tag vỹ kuryj nĩ, jãvo tag vỹ kygnẽ kỹ nĩ,” he jé tóg ke mũ, ù tỹ ki kanhrãn há han mũ ẽn.

6

¹ Ājag tỹ ver gĩr kāsir ri ke nỹtĩ ra sóg ājag mỹ Jesus kāmén vén ja ěn tó sór tũ nĩ ha. Sỹ ājag mỹ ũn sanh ag tũ kāmén sór vē ha, ājag tỹ ver to tar nỹtĩ tũ ra. Jesus kāmén vén jã ěn hã vē, gĩr tỹ ã pafa ja kron ěn ri ken hã vē, ha mẽ: vĕnh jykre kórég tovãnh jé ěg tóg ke mũ, ěg tỹ nén to ter ke mũ ěn tovãnh kãn jé ěg tóg ke mũ. Topĕ ki rã jé ěg tóg ke mũ. ² Ũ tỹ ti ki rã mũ ěn kype jé ěg tóg ke mũ, kỹ ěg tóg ti kri ěg nĩgé finh ke mũ gé, ti tỹ ěg mré Jesus ki rã kỹ jĕ jé. Kar kỹ ěg tóg ěg ter kar kỹ rĩr mãn ěn to jykrén ke mũ gé, Topĕ tỹ ěg jykre tugnỹm ke ěn to. Vĕnh kãme tag kar vỹ gĩr tỹ ã pafa ja kron ěn ri ke nĩ. ³ Tag tó mãn sór tũ inh nĩ ha, ājag tỹ vãsỹ mẽ ja tag. Sỹ ājag mỹ tag pãte Jesus kāmén sór vē, kỹ tóg ũn sanh tỹ vĕjĕn kufy ko ěn ri ke nĩ. Topĕ tỹ tag to isar han kỹ sóg ājag mỹ kāmén há han ke mũ.

⁴ Ha mẽ, ěg kãmĩ ũ ag tóg ag tỹ Topĕ ki rã kar kỹ (ag tóg) ti tovãnh pĕ han ja nĩgtĩ. Kỹ ag tóg ti ki ge mãn ke tũ nỹtĩ ha. Ěg tỹ Topĕ ki ge kỹ tóg ěg kanhrãn ke mũ, vĕnh jykre há ki. Topĕ vỹ ěg mỹ kanhkã tá vĕnh jykre há ěn nĩm mũ. Ěg mỹ tóg ã kuprĩg jĕnĕg mũ gé. ⁵ Topĕ vĩ há nĩ ěn vég ěg tóg tĩ. Ěg tỹ kanhkã tá nén venh ke ěn ve sĩ han ěg tóg tĩ, ěprã, ěg tỹ Topĕ ki ge kỹ. ⁶ Ũ tỹ ti jykre tag ve kar kỹ ti tovãnh pĕ han kỹ tóg vĕnhmỹ nĩ. Kỹ tóg ti ki rã mãn ke tũ nĩ ha, ã jykre kórég tovãnh mãn ke tũ ti nĩ ha, ũ tỹ ti tovãnh pĕ han mũ ěn ti. Ha vé, ěg tỹ ti ki rã há han kar kỹ ti tovãnh kỹ ěg tóg ti tỹ cruz to sa mãn ri ke han mãn mũ sir, Topĕ kósin ti. Ěg tỹ vĕnh kar tỹ ti to é he han mãn vē sir.

⁷ Ěpỹ ri ke ti nĩ, ha mẽ. Ta tỹ ti kri kutĕ kỹ ga mrãn

kỹ ẽg jakré tóg mog há han tĩ, ẽg tỹ ga há ki ti krãn ti kỹ. Ẽg tỹ ẽpỹ há ri ke nỹtĩn kỹ, ẽg tỹ Topẽ mỹ vẽn jykre há han kỹ tóg ẽg ve há han mũ, Topẽ ti. ⁸ Ẽpỹ ỹ tóg hã ra kórég nĩ. Kỹ sỏnh hã tóg ki munmur tĩ, vãn h ti ke gé, kỹ tóg mogmog kỏnãn tĩ sir, ẽg jakré ti. Ẽg tỹ ẽpỹ kórég ẽn ri ke nỹtĩn kỹ Topẽ vỹ ẽg tovãn h ke mũ sir, kỹ tóg ẽg mỹ vĩ kỏnãn han ke mũ, kỹ ẽg kejẽn pũr ke mũ, kurã ẽn kã.

⁹ Ha mẽ, vĩ tar han inh huri. Hã ra ẫjag tóg ti jagy tag venh ke tũ pẽ nĩ, ki kanhró inh nĩ. Ẽjag to sóg há nĩ. Krenkren jé ẫjag tóg ke mũ, ki kanhró inh nĩ. ¹⁰ Rãnhrãj há han ẫjag tóg tĩ. Ti to ẫjag há tãvĩ nỹtĩ. Ti tũ ki rĩr há han ẫjag tóg tĩ gé. Topẽ vỹ tag vэг tĩ, ẫjag rãnhrãj há tag. Ti pi(jé) kã jatu nĩgtĩ'. Vẽn jykre vẽn h mỹ han tũ pẽ ti nĩgtĩ, Topẽ ti. ¹¹ Hã ra sóg ẫjag mỹ tag tó, ẫjag tỹ ti to tar tãvĩ nỹtĩ jé, ẫjag tỹ ti to krỏnh ke tũ nĩ jé. Kỹ ẫjag tóg venh ke mũ, ẫjag tỹ nén (ũ) ve sỏr mũ ẽn ti. ¹² Ẽjag tỹ ti to krỏnh ken kỹ tóg kórég nĩ. Ỗ tóg ẽg jo Topẽ ki rã ja nĩgtĩ, hã ra ag tóg ti tovãn h ja tũ pẽ nĩgtĩ, kỹ ag tóg hur vé, Topẽ tỹ ẽg mỹ nén ven sỏr mũ ẽn ti. Tag ag ri ke han nĩ, ỹ tỹ ẽg jo ti tovãn h jãvãn h ẽn ag ri ke han nĩ.

Topẽ tỹ ẫ vĩ ẽn han kãn ke

¹³⁻¹⁴ Topẽ vỹ Abraão mỹ: “ẫ to vĩ há han jé sóg ke mũ, ẫ krẽ e han jé sóg ke mũ,” he ja nĩ. Kỹ tóg ti mỹ: “ẫ pi(jé) tag venh ke tũ nĩ', inh hã vỹ ki kanhró nĩ',” he ja nĩ gé. Ỗ tỹ ti kãfỏr nĩ ra tóg ẽn to: “ti hã vỹ ki kanhró nĩ,” henh ke vẽ vẽ. Hã ra ỹ tóg Topẽ kãfỏr nĩ tũ nĩ, hã kỹ tóg: “inh hã vỹ ki kanhró nĩ,” he ja nĩ, Topẽ ti. ¹⁵ Kỹ Abraão vỹ Topẽ tỹ ti mỹ nén tó ja

tag to tar nĩ ja nĩgtĩ gé. Jatun mĩ tóg ã kósin ke ěn jãvãnh ja nĩgtĩ, hã ký tóg kejĕn ti vé.

¹⁶ Ěprã ke ag vỹ, ag tỹ jagnĕ mỹ vĩ há han sór ký ag tóg jagnĕ mỹ: “inh kri nĩ ěn vỹ ki kanhró nĩ, sỹ ã mỹ nĕn han ke ti,” he tĩ. Tag tó ký ag tóg jagnĕ jũ tỹ tũ' he tĩ. Ũ tỹ tag tó ký ag tóg ki kanhró nỹtĩ, ti tỹ ki hã tó ja ti. Ěprã ke ag jykre hã vē. ¹⁷ Vĕnh jykre tag han ja ti nĩ, Topĕ ti, ti tỹ ěg mỹ ã vĩ jĕnĕn ký. Ti tỹ ěg mỹ nĕn tó ja ěn ve jé ěg tóg ke mũ. Ěg tỹ tag ki kanhrãn há han hã jé tóg ěg mỹ: “ki kanhró inh nĩ,” he ja nĩ. Tó ũ han mãn ke tũ ti nĩ ha. Ā tỹ tó ja ěn hã han jé tóg ke mũ, ti tỹ: “ki kanhró inh nĩ,” hen ký. ¹⁸ Ti vĩ régre to ěg tóg ki kanhrãn há han tĩ. Ěg mỹ tó kar ký tóg: “ki kanhró inh nĩ,” he ja nĩ gé. Ti vĩ régre hã vē. Hã ký ěg tóg venh ke mũ, ti tỹ ěg mỹ nĕn tó ja ti. Tó ũ han mãn ke tũ ti nĩ ha, hã ra tóg ón ja tũ nĩ gé, ti tỹ ón ki kagtĩg nĩn ký. Ti tỹ ěg mỹ nĕn tó ja ěn ve sór ěg tóg mũ, hã vỹ: kanhkã, he mũ, hã ký tóg ěg hã mỹ tó ja nĩ, Topĕ ti. ¹⁹ Ěg tỹ kanhkã ve sór ký ěg tóg to krónh ke tũ nĩgtĩ. Ěg tỹ kanhkã tá ũn ve sór mũ hã vỹ ěg tar han tĩ, ěg tỹ tỹ prãnh ke tũ nĩ jé. Tá jun jé ěg tóg ke mũ, ha vemnĩ, Topĕ jamã tá. ²⁰ Jesus vỹ tá jun vén, ěg jo, ký tóg ěg mỹ Topĕ to ěpry ti han, Topĕ to ěmĩn ti. Ěg jagfy tóg tỹ Topĕ tũ ki rĩr tĩ to pã'i mág nĩ, Melquisedeque ěn ri ke. Kurã krỹg ja tũ ti nĩ, ti tỹ tỹ pã'i nĩ ti. Ký tóg ěg jo Topĕ rĩnja tá nĩ nĩ, ěg tỹ ti nón tá junjun jé gé.

7

Melquisedeque kãme

¹ Melquisedeque ên vỹ tỹ pã'i mág nĩ ja nĩgtĩ, cidade tỹ Salém kri, kỹ tóg Topẽ tũ ki rĩr nĩ ja nĩgtĩ gé, ù tỹ vẽn h kar kri ke nĩ ên tũ ki. Abraão vỹ pã'i tỹ 4 (ke) ên mré vẽn h génh han ja nĩ. Ti tỹ ag kãgtén kar kỹ Melquisedeque ên vỹ ti kato tẽ, kỹ tóg ti mỹ: “Topẽ vỹ ã ve há han, kỹ tóg ã ve há han mãn ke mũ gé,” he mũ. ² Kỹ Abraão vỹ ti mỹ dízimo ên nĩm mũ sir, ã tũ tỹ 10 (ke) kar ki tóg ùn pir nĩm mũ sir, Melquisedeque mỹ, ti tỹ ùn kato tẽ mũ ên ag tũ mãn ja tỹ dízimo ên ti. Ti jiji to ken hã vẽ, hã vỹ: vẽn h jykre kuryj to pã'i, he mũ, hã vỹ: Melquisedeque, he mũ. Kỹ tóg tỹ cidade tỹ Salém to pã'i nĩ, hã vỹ: ùn krĩ kuprã ên ag pã'i, he mũ. ³ Panh tũ ti nĩ, mỹnh tũ ke gé, jóg'jóg ve tũ ti nĩ gé. Û ki mur já tũ ti nĩ, kỹ tóg ter ja tũ nĩ gé. Topẽ kósin ri ke ja ti nĩ. Topẽ tũ ki rĩr kỹ tóg nĩ nĩ, ti kurã vỹ krỹg ja tũ nĩ, Melquisedeque kurã ti.

⁴ Pã'i mág pẽ vẽ, Melquisedeque ti, hã kỹ Abraão vỹ ti mỹ ã tũ tỹ dízimo nĩm ja nĩ gé. Hã ki êg tóg ki kanhró nỹtĩ, ti tỹ Abraão kãfór nĩ ti, Melquisedeque ti. ⁵ Û tỹ Israel ag kãmĩ dízimo mág tĩ ag vỹ tỹ Levi krẽ nỹtĩ, ù tỹ Topẽ tũ ki rĩr tĩ ên ag. ãjag mré ke ki ag tóg dízimo ên mág tĩ, ag kar tỹ tỹ Abraão krẽ'krẽ nỹtĩ ra. ⁶ Hã ra Melquisedeque pi(jé) tỹ Abraão mré ke nĩ ja nĩgtĩ!. Ge ra Abraão tóg ti mỹ dízimo ên nĩm ja nĩ, kỹ tóg ti mỹ: “Topẽ vỹ ã ve há han,” he mũ gé, Melquisedeque ti, Abraão mỹ, Topẽ tỹ Abraão mré vêmén kar kỹ, Topẽ tỹ ti mỹ: “ã kófa ra ã kósin ke mũ,” he kar kỹ. ⁷ Kỹ tóg Abraão kãfór nĩ, Melquisedeque ti, ti tỹ ti mỹ: “Topẽ vỹ ã ve há han,” hen kỹ. Ti kri ke vỹ tỹ ti jẽ.

⁸ Levi krẽ'krẽ ên vỹ tỹ ãprã ke nỹtĩ gé, ù tỹ

ājag mré ke ki dízimo mǎg tĩ ěn ag. Hǎ ra Melquisedeque vỹ ter ja tũ nĩ nĕji, hǎ kỹ tóg rán kỹ nĩ, Topĕ vỹ tỹ rán kỹ nĩ ki. Ũn ter tũ vỹ Abraão ki dízimo mǎn ja nĩ, hǎ vỹ: Melquisedeque, he mũ. ⁹ Kỹ, Abraão tỹ ti mỹ dízimo nĩm ěn kǎ tóg ǎ krĕ'krĕ kósin tỹ Levi jagfy ti mỹ dízimo nĩm ja nĩ gé, Melquisedeque mỹ. Hǎ kỹ Levi krĕ'krĕ ag vỹ ājag mré ke ag ki dízimo ve ja nĩgtĩ gé sir. ¹⁰ Abraão tỹ Melquisedeque mỹ dízimo nĩm ěn kǎ Levi vỹ mur ja tũ nĩ ver, hǎ kỹ ti jóg'jóg ve tỹ Abraão vỹ ti jagfy dízimo nĩm ja nĩ. Nĩm kar kỹ tóg kejĕn Levi vovo han mũ sir, Abraão ti, Melquisedeque tỹ ti mré vĕmĕn kar kỹ.

¹¹ Topĕ tỹ Levi krĕ'krĕ ag mỹ: “isũ ki rĩrmnĩ,” he ěn kǎ tóg ag mỹ tag to vĕnh jykre nĩm ja nĩgtĩ gé, ag tỹ ki rĩr ke to. Ag hǎ tỹ ki rĩr há han ke vĕ vĕ, hǎ ra ag tóg ki rĩr kǎn jǎ tũ nĩ, hǎ kỹ Topĕ tóg ũ tỹ ki rĩr ke mũ ũ jĕnĕ ja nĩ, ũ tỹ Melquisedeque ri ke ěn, hǎ vỹ: Jesus Cristo, he mũ. Ag tỹ ki rĩr há han ja nĩ ra Topĕ hỹn ti jĕnĕnh ke tũ nĩ vĕ, kỹ Arǎo krĕ'krĕ ěn ag hǎ vỹ ki rĩr nỹtĩnh ke vĕ vĕ. ¹² Kỹ, Jesus tỹ Topĕ tũ ki rĩr kỹ Topĕ vỹ ti mỹ tag to vĕnh jykre tǎg han ja nĩ gé. ¹³⁻¹⁴ Hǎ kỹ tóg ki rĩr nĩ sir. Ti pi(jé) tỹ Levi krĕ'krĕ ag kǎ ũ nĩ', ěg Senhor tỹ Jesus ti. Judá krĕ'krĕ ag kǎ ũ vỹ tỹ ti nĩ. Ge ra tóg Topĕ tũ ki rĩr mũ. Judá krĕ'krĕ ũ tóg Topĕ tũ ki rĩr ke tũ tĩ vĕ, ag tỹ Topĕ mỹ nĕn ũ pũn ke tũ vĕ vĕ. Ag rǎnrǎj tũ vĕ vĕ, tag, Judá krĕ'krĕ ag, kỹ Moisés tóg ag to nĕn ũ tó ja tũ nĩ gé, ti tỹ Topĕ tũ ki rĩr ke tag rán kỹ. Hǎ ra Jesus tóg Topĕ tũ ag ki rĩr jĕ, ti tỹ tỹ Judá krĕ'krĕ ag kǎ ũ nĩ ra. Topĕ tỹ ti mỹ vĕnh jykre tǎg nĩm hǎ vĕ.

Jesus tỹ Melquisedeque ri ke nĩ

15 Levi krē'krē ag vỹ Topẽ rãnrãj han kãn ki kagtĩg ja nĩgtĩ. Hã ký Topẽ tóg ã tũ ki rĩr ke ù jé prẽr, ù tỹ Melquisedeque ri ke ên, hã vỹ: ãg Senhor tỹ Jesus, he mũ. Hã ki ãg tóg vég tĩ, Levi krē'krē ag tỹ ti rãnrãj han ki kagtĩg nỹtĩ ti. 16 Ký ãg Senhor tỹ Jesus pi(jé) ãprã ke ag jykre ri ke han ký Topẽ tũ ki rĩr mũ', ký ãprã ke ù vỹ: “ha ki rĩr,” he ja tũ nĩ gé. Topẽ tỹ ti mỹ nén tó jan hã vẽ. Ter mãn ke tũ ti nĩ ha, hã ký tóg ki rĩr há han mũ ha. 17 Ti to tag tóg rán ký nĩ, Topẽ vỹ tỹ rán ký nĩ ki, ha mẽ: “isũ ki rĩr jé ã tóg ke mũ. Tũ' henh ke tũ (pẽ) ti nĩ, ã tỹ isũ ki rĩr nĩ ti, Melquisedeque tỹ isũ ki rĩr nĩ ên ri ke,” he ja ti nĩ. 18 Tag tó ký tóg Moisés jykre ên tỹ tũ' he mũ, ti krój nĩn ký, ti tỹ ãg há han mãn ki kagtĩg nĩn ký. 19 Hỹ, Moisés jykre ên vỹ ãg tar han ki kagtĩg ja nĩgtĩ, ãg tỹ Topẽ vỹ ki króm han ki kagtĩg ja tóg nĩgtĩ, ký ãg ti jykre han sór mũ ra kanhkã tá jun ke tũ nĩ, ãg tỹ Moisés jykre han mũ ra. Vãhã Topẽ tóg ãg mỹ vênh jykre tãg nĩm ja nĩ, ù tỹ Moisés jykre kãfór nĩ ên, hã vỹ: Jesus jykre, he mũ. Ký ãg tóg Jesus tigrĩn Topẽ nĩgja tá junjun ke mũ.

20 Tag to Topẽ tóg vỹ kãfór han ja nĩ. Moisés tỹ Levi krē'krē mỹ: “Topẽ tũ ki rĩrmnĩ,” hen ký tóg vỹ kãfór han ja tũ nĩ. 21 Hã ra Topẽ tóg Jesus mỹ tag tó. Ti mỹ tóg: “isũ ag ki rĩr jé ã tóg ke mũ,” he ja nĩ. “Tũg ke tũ ti nĩ, ã tỹ isũ ag ki rĩr tĩ ên ti. Vỹ kãfór han inh mỹr. Tó ù han mãn ke tũ sóg nĩ, vênh jykre ù han mãn ke tũ sóg nĩ,” he ja tóg nĩ, ãg jóg mág ti, ã kósin mỹ. 22 Hã ký Jesus jykre vỹ Moisés jykre kãfór nĩ, Jesus tỹ ãg mỹ vênh jykre tãg nĩm mũ ên. 23 Nén ù ki tóg sir Moisés jykre ri ke tũ nĩ, Jesus jykre ti, ha mẽ. Moisés jykre ki Topẽ tũ ki rĩr tĩ ag vỹ e ja

nýtĩgtĩ. Ājag kã ũ ter kŷ ag tóg jagně jĕgja kã ũ fĕg' he ja nĩgtĩ, ti tŷ Topě mŷ ti tũ ki rĩr jé. Hã kŷ ag tóg e ja nýtĩgtĩ, Moisés jykre ki Topě tũ ki rĩr tĩ ag. ²⁴ Hã ra Jesus vŷ ter mãn ke tũ nĩ inhhã, Topě tũ ki rĩr tóg nĩ nĩ, ũ tóg ti jĕgja kã jĕnh ke tũ nĩ. ²⁵ Hã kŷ tóg ã tŷ ũn ki rĩr nĩ mũ ag kar krenkren han tĩ, ũ tŷ ti tigrĩn Topě jamã tá junjun ke mũ ĕn ag kar. Rĩr tóg nĩ nĩ, kŷ tóg ĕg jagfy Topě mré vĕmén tĩ. Kurã krŷg ja tũ ti nĩ, Jesus ti.

²⁶ Ĕg to ti há nĩ, Jesus ti, ti tŷ ĕg jagfy Topě tũ ki rĩr nĩn kŷ. Topě kósin vŷ tŷ ti nĩ. Kygně ja tũ pĕ ti nĩ. Nén ũ kórég venh ke tũ ĕg nĩ, ti ki. Topě vĩ mranh tĩ ag mré ke tũ vĕ. Kŷ tóg tŷ kanhkã tãn kar ag kri ke nĩ gé sir, ũri. ²⁷ Ĕprã ke ag tŷ Topě tũ ki rĩr nýtĩn kŷ ag tóg ājag tŷ Topě vĩ mranh ja tigrĩn Topě mŷ nén ũ pũn vén tĩ, kurã kar ki, kar kŷ ag tóg ājag mré ke ag tŷ Topě vĩ mranh tigrĩn ag jagfy Topě mŷ nén ũ pũn tĩ gé sir. Jesus vŷ Topě vĩ mranh ja tũ nĩ inhhã. Hã kŷ tóg, ã tŷ vĕnh fĕg kŷ tóg ag tŷ Topě mŷ nén ũ pũn ri ke han. Vĕnh fĕg pir han tóg, kŷ tóg ã tŷ vĕnh fĕg pir ĕn ki ĕg tŷ Topě vĩ mranh e ja ĕn tŷ tũ' he kãn. ²⁸ Moisés tŷ ĕprã ke ag mŷ: “Topě tũ ki rĩr,” hen kŷ ag tóg ki rĩr mũ, hã ra ag tóg kygně mág kŷ nýtĩ ja nĩgtĩ gé, ag tŷ tŷ ĕprã ke nýtĩn kŷ. Hã ra Topě tóg vĕnh jykre tãg han kŷ tóg ã kósin mŷ: “ki rĩr jé ã tóg ke mũ, tag to sóg vĩ kãfór han mũ,” he ja nĩ. Ũ tŷ kygně ja tũ pĕ ĕn mŷ tóg tag tó ja nĩ, hã kŷ tóg kygnĕnh ke tũ pĕ nĩ gé.

8

Jesus hã tŷ ĕg jagfy Topě tũ ki rĩr

¹ Ha mẽ, sỹ ãjag mẽ nén kãmén ja ti. Tag tó sór ja inh nĩ, ha mẽ. Ēg jagfy Topẽ tũ ki rĩr tĩ to pã'i mág hã vỹ nĩ nĩ. Topẽ pẽgja tá tóg nĩ nĩ, kanhkã tá. ² Topẽ nĩg jafã pẽ tá tóg ti tũ ki rĩr mũ. Topẽ nĩgja pẽ ěn pi(jé) tỹ ěprã ke ag tỹ há nĩ'. Topẽ hã tỹ há vễ, ěn ti. Ēn tá tóg nĩ nĩ, ěg jagfy, Topẽ tũ ki rĩr nĩ ěn ti.

³ Topẽ tũ ki rĩr tĩ to pã'i mág jykren hã vễ, ha mẽ. Topẽ mẽ ag tóg nén ù nĩ pũn tĩ, nén ù ù ke gé. Kỹ ù tỹ ěg jagfy Topẽ tũ ki rĩr tĩ to pã'i mág tag vỹ Topẽ mẽ nén (ũ) nĩm ke mũ gé, Jesus ti, hã vỹ: vễnh fễg, he mũ. ⁴ Ti tỹ ver tag mũ ga kri mũ ag mré ga kri tĩ ra Topẽ tóg ti mẽ vễnh rãnrãj tag nĩm ke tũ nĩ vễ, ti tỹ Topẽ tũ ki rĩr jé. Ēprã ù tỹ Topẽ tũ ki rĩr mũ ag vỹ nỹtĩ ver, ù tỹ Judeu ag jykre ki Topẽ tũ ki rĩr mũ ù ag. ⁵ Topẽ jo ĩn krẽm ag tóg nén ù nĩ pũn tĩ, Moisés tỹ ag mẽ vễnh jykre nĩm kỹ. Topẽ vỹ Moisés mẽ tó ja nĩ, ti tỹ kur tỹ Topẽ jo ĩn han jé. Ti mẽ tóg: “ã mẽ sóg ã tỹ nén han ke mũ ěn ti ven kãn huri,” he mũ. “Ã tỹ pãnónh kri nĩ ěn kã sóg ã mẽ ven kãn. Sỹ ã mẽ nén ven mũ ěn hã han nĩ,” he ja tóg nĩ, Topẽ ti, Moisés mẽ, hã kỹ tóg han. ĩn ěn krẽm ag tóg ùri nén ù ù pũn tĩ, Judeu ag jykre ki, Topẽ tũ ki rĩr tĩ ag. Hã ra tóg tỹ kanhkã tá vễnh jykre tag hã pẽ tũ nĩ ver. Nén sĩ ki tóg ri ke nĩ, ag tỹ nén han mũ ti, kanhkã tá vễnh jykre ri ke sĩ ti nĩ. Jesus hã vỹ kanhkã tá vễnh jykre pẽ ěn han kãn mũ.

⁶ Hã kỹ Jesus rãnrãj vỹ ěprã ke ag rãnrãj kãfór nĩ. Topẽ vỹ ěg mẽ Jesus jẽnẽ, ti tỹ ěg mẽ vễnh jykre tãg nĩm jé, kỹ tóg ti tỹ Moisés tỹ ěg mẽ vễnh jykre há nĩm ěn há kãfór nĩ. Kỹ tóg ěg mẽ nén ù há tãvĩ han ke mũ, Topẽ ti, ti tỹ Jesus jẽnẽn kỹ. Hã kỹ Jesus rãnrãj vỹ Moisés rãnrãj kãfór nĩ, Jesus tỹ ěg mẽ

věnh pãte fón ken kÿ. ⁷ Topě mÿ tóg pãgsĩ ja nĩ, ã tÿ Moisés mÿ věnh jykre nĩm ja ěn ti, hã kÿ tóg věnh jykre tãg han to jykrén ja nĩ. ⁸ Ā povo jykre ve kÿ tóg ti mÿ kórég nĩ, hã kÿ tóg tag tó, ha mẽ. “Kãnhmar sóg povo tÿ Israel mÿ věnh jykre tãg nĩm ke mũ, Judá krě'krě ag mÿ ke gé,” he ja tóg nĩ, ěg jóg mág ti. ⁹ Věnh jykre tãg tag vÿ isÿ ag jóg'jóg ve ag mÿ věnh jykre nĩm ja ěn ri ke tũ nĩnh mũ. Ag jóg'jóg ve ag mÿ sóg věnh jykre ù nĩm ja nĩ gé, isÿ ga tÿ Ěgito tá ag kãpan kÿ. Ag nĩgé kãgmĩ kÿ sóg ag tatĩn kãtĩ mũ, ag ga pẽ ra. Hã ra ag tóg isÿ ag mÿ věnh jykre nĩm ja ěn mranh, hã kÿ sóg sir ag togvãnh ja nĩ,” he tóg, ěg jóg mág ti. ¹⁰ “Hã ra sóg vãhã ag mÿ věnh jykre tãg han sór mũ, povo tÿ Israel ag mÿ, ha mẽ,” he tóg, ěg jóg mág ti. “Ājag krĩ tÿ ag tóg isÿ ag jyvẽn mũ ěn ki kanhrãn ke mũ, kÿ ag tóg han sór ke mũ gé, ti tÿ ag fe kãkã nĩn kÿ. Ag Topě vÿ tÿ inh nĩnh mũ, kÿ ag tóg tÿ inh krě nÿtĩnh ke mũ gé, ěn kã. ¹¹ Kÿ ù tóg ã mré ke ag kanhrãn mãn ke tũ nĩ ha. “Ěg jóg mág vÿ ge nĩgtĩ, ge ti nĩgtĩ,” he mãn ke tũ ag nÿtĩ ha, jagně mÿ. Ag kar vÿ inh ki kanhró nÿtĩnh mũ, ěn kã, ùn kãsir ag, ùn mág ag ke gé, ěn kã. ¹² Ag tÿ inh vĩ mranh mũ (hã) ra sóg ge ra ag jagãgtãn ke mũ. Věnh pãte fón jé sóg ke mũ, ag tÿ inh vĩ mranh ja ěn ti,” he ja tóg nĩ, Topě ti.

¹³ Kÿ, Topě tÿ věnh jykre tãg han kÿ věnh jykre ve ěn vÿ ti mÿ tÿ věnh jykre si nĩ sir. Hã ra nén (ũ) si kar ěn vÿ kejẽn tũ' henh ke mũ, kãnhmar.

9

Vãsÿ Topě jykre mré ùri Topě jykre

¹ Topẽ tỹ ag mỹ vẽnh jykre ve ẽn nĩm kỹ tóg ag mỹ ag tỹ nén han ke ẽn kãmén ja nĩ. Ag tỹ ti jo ın han tó ja ti nĩ, kar kỹ tóg ag tỹ ti jo ın krêm ti mré vémén ke tó ja nĩ gé, ag tỹ ti mỹ nén (ũ) pũn ke ti ke gé. ² Kỹ ag tóg kur tỹ ın ẽn han, ti tỹ tỹ Topẽ jo ın jẽ jé. Hã ra tóg vẽnh kãpãm kỹ nĩ, kur tỹ ke gé, kỹ ag tóg ın vãfynyn ki jun vén mũ ẽn to ag tóg: “Topẽ mré vĩ jafã,” he tĩ. Ẽn tá mesa kri vela tỹ kri vin jafã vỹ jẽ, kar kỹ mesa ti ke gé, mesa tỹ kri pão vin jafã ẽn. ³ Tag pãte tóg kur nĩ, jãnkã tỹ kur, kỹ kur ẽn pãte ın vãfynyn ũ vỹ nĩ gé, ın sĩ. Ẽn to ag tóg: “Topẽ nĩg jafã,” he tĩ, ın vãfynyn ẽn to. ⁴ Tá tóg Topẽ mỹ kri nén (ũ) pũn jafã nĩ, ouro tỹ há ti. Kri ag tóg nén ũ ger há pũn tĩ, ouro ẽn kri. Kar kỹ Topẽ caixa vỹ tá nỹ gé. Ti to tĩr hã vỹ tỹ ouro nĩ. Caixa ẽn kãkã ouro tỹ pẽnky vỹ nĩ, kỹ kanhkã tá vějẽn vỹ pẽnky ẽn ki nĩ, Topẽ tỹ ag mỹ pão jẽnẽ ẽn ti, ag tỹ ga kórég kri mũn kỹ. Kar kỹ Arão vátó vỹ kã nỹ gé, ti kãtó ti, kãtó féj mũ ẽn ti. Caixa ẽn kãkã tóg nỹ nĩ, vátó ẽn ti. Kar kỹ Topẽ tỹ Moisés mỹ vẽnhrá nĩm ja ẽn vỹ kãki nỹtĩ gé, caixa ẽn kãki. Pó régre ki tóg rãnrãn ja nĩ, Moisés ti, Topẽ tỹ ẽg jyvẽn mũ ẽn ti. Pó régre ẽn tóg caixa kãki nỹtĩ gé. ⁵ Caixa ẽn kri tóg nỹtĩ, Topẽ tỹ jẽgnẽ jafã régre ag kãggrá, querubim he mũ ẽn, ũ tỹ Topẽ rĩnja tá nỹtĩ ẽn. Fẽr ag nỹtĩ, kỹ ag fẽr tóg krỹg he kỹ nỹtĩ. Ag fẽr fẽnja krêm Topẽ vỹ ẽg mỹ vẽnh pãte fón tĩ, ẽg tỹ ti vĩ mranh ja ti. Hã ra sóg tag kãmén kãn sór tũ nĩ ver.

⁶ Kỹ tóg vãfynyn régre nĩ, ın tỹ kur ẽn ti, Topẽ tũ ẽn ti. Ti vãfynyn ve ki ag tóg kãra ge tĩ, Topẽ tũ ki rĩr tĩ ag, kurã kar ki. Tá ag tóg ãjag rãnrãj ti han tĩ. ⁷ Ti vãfynyn ũ ẽn tá tóg kãra rã pin' he tĩ, prỹg kar ki, ag to pã'i mág ti, ti tãvĩ. Ag mẽg kyvẽnh ma tóg

tĩ tĩ, Topẽ mỹ ven jé, Topẽ tỹ ti mỹ vẽn h pãte fón jé, povo kar mỹ ke gé, ag tỹ Topẽ vĩ mranh ja ẽn ti, ag tỹ mranh sór tũ ra mranh ja ẽn ti.

⁸ Topẽ kuprĩg vĩ ẽg mỹ kãmén mũ, ũri, vẽn h jykre si ẽn ti. Kur tỹ ỉn vãfynyn vĩ ge nĩ, ha mẽ. Ti vãfynyn ve ẽn tỹ ver ỉn krẽm nĩn kỹ ẽg tóg ti vãfynyn ũ tá jun ke tũ nĩ ver, Topẽ nĩgjařã tá. ⁹ Ẽg tỹ ũri vég mũ tag ki kanhrãn jé, hã jé Topẽ tóg vẽn h jykre tag han ja nĩgtĩ, ẽg tỹ to comparação han jé. Topẽ jo ỉn ẽn tá ag tóg Topẽ mỹ nén ũ pũn tĩ, kỹ ag tóg ag mẽg ti tãnh kỹ pũn tĩ gé. Ag tỹ Topẽ mỹ sĩnvĩ nỹtĩ sór vẽn, hã jé ag tóg ti mỹ nén (ũ) pũn tĩ. Hã ra ag tóg ti mỹ pũn mũ ra (ag tóg ti mỹ) sĩnvĩ tũ nỹtĩ, ag jykre tỹ ver kórég nĩn kỹ. ¹⁰ Kỹ, ag tỹ ti mỹ pũn há han jé ag tóg vẽn h jykre tỹ ge han tĩ gé, ha mẽ: vẽn h to ag tóg jykrén tĩ, kỹ ag tóg vẽn h ũ to: “tag konh ke tũ ẽg nĩ, tag kron ke tũ ẽg nĩ,” he tĩ, ti tỹ ag mỹ tó kỹ nĩn kỹ. Kỹ ag tóg goj tỹ vẽn h kygpe tỹ hẽn ri ke han han tĩ gé. Tag ki vẽn h jykre kar vẽn, ẽpra. Kỹ Topẽ tỹ vẽn h jykre tãg han kỹ ẽn vĩ tóg tũ' he mũ sir.

¹¹ Vãhã Cristo vĩ hur kãtĩg, kỹ tóg tỹ ẽg jagfy Topẽ tũ ki rĩr to pã'i mág nĩ ha, kỹ tóg ẽg kren pẽn han mũ. Ti tỹ Topẽ jo ỉn kãra rã vĩ ỉn si ẽn mág kãfór nĩ gé. Há tãvĩ ti nĩ, Jesus tỹ hẽn tá Topẽ tũ ki rĩr nĩ ẽn ti. Ẽpra ke tỹ ỉn há pijé', tag ki ỉn pijé', kanhkã tá ke vẽn. ¹² Kỹ, Jesus tỹ ẽn kãra rã kỹ tóg rã pir han, Topẽ nĩgjařã pẽn ẽn kãra, Topẽ tỹ ẽg mỹ vẽn h pãte fón jé. Kỹ tóg, ã tỹ kãra rã kỹ ti pi(jé) ag mẽg kyvẽn h ma vyr', cabrito ẽn, monh tãgy ẽn. Ẽ kyvẽn h hã tỹ tóg ẽg kren pẽn han, Jesus ti.

¹³ Ẽ ter kỹ ũ tỹ ti va mũ mũ ẽn ag vĩ, ag tỹ Topẽ jo ỉn kã ra ge sór kỹ ag vĩ Topẽ tũ ki rĩr tĩ ag mỹ:

“ha ãg to tỹ kó kó hé, ãg mẽg kyvénh tỹ,” he tĩ. Ag tỹ ag to tỹ kó kó he kar kỹ ag tóg jãnhkri nỹtĩ sir, ag tỹ cabrito kyvénh tỹ ag to tỹ kó kó hen kỹ, ke tũ nĩn kỹ monh kyvénh tỹ, ke tũ nĩn kỹ monh fi pũr tỹ mrẽj tỹ. Ag tỹ ag jãnhkri han jan hã vẽ. ¹⁴ Hã ra Cristo vỹ ã kyvénh hã tỹ ãg jãnhkri pẽ han. Topẽ kuprĩg tỹ ti krĩn kỹ tóg Topẽ mỹ vẽnh fẽg, Cristo ti. Kygnẽ ja tũ pẽ ti nĩ, hã kỹ tóg há kar nĩ, ti tỹ vẽnh fẽg kỹ. Ti kyvénh vỹ ãg jãnhkri pẽ han mũ, ãg jykre mré tóg ãg kuryj han mũ, kỹ ãg tóg vẽnh jykre kórég han mãn ke tũ nĩ sir, ãg tỹ ãg jykre si tugrĩn ter ke mũ ãn ti. Vãhã ãg tóg Topẽ tũ han há nĩgtĩ, ãn rĩr nĩ ãn tũ ti.

Cristo tỹ ãg mỹ vẽnh jykre tãg ma kãtĩg

¹⁵ Hã kỹ Cristo vỹ ãg mỹ vẽnh jykre tãg ma kãtĩg. Ter ja tóg nĩ, Topẽ tỹ ãg mỹ vẽnh pãte fón jé, ãg tỹ ti jykre ve mranh ãn ti. Ti ter kar kỹ Topẽ tóg ã ag kuprẽg huri, ag tỹ Topẽ tỹ kanhkã tá ãg mỹ nén ven ke ãn ki kanhrãn jé. Jesus tỹ ãg mỹ han hã vẽ.

¹⁶ Kejẽn ã tóg ã ter ke to hã: “iser kar kỹ ãn vỹ isũ tag mãn ke mũ, ã ãn vỹ isũ ã mãn ke mũ gé,” he tĩ. Rán tóg tĩ, tag, kỹ tóg tógfĩg tĩ, vẽnh rá ti. Kỹ ag tóg ag tỹ vẽnh rá ãn ve sór mũ ra ag tóg ti ter kar kỹ hã vég tĩ. ¹⁷ Ti tỹ ver ter tũ nĩn kỹ ag tóg vẽnh rá ãn venh ke tũ nĩ. “Iser kar kỹ,” he tóg, hã kỹ ã tóg ver ti tũ mãg tũ nĩ, ti tỹ ver ter tũ nĩn kỹ, ã tỹ rán mũ ãn ti. ¹⁸ Ri ke ti nĩ, Topẽ tỹ ãg mỹ vẽnh jykre nĩm ja ãn ti, ti si mré hã. Ag mẽg ter kar kỹ ke ja vẽ. ¹⁹ Hã kỹ Moisés vỹ povo kar mỹ Topẽ tỹ ti mỹ nén tó ja ãn kãmén, Topẽ tỹ nén to ag jyvẽn mũ ãn ti. Ti tỹ ag mỹ kãmén kar kỹ tóg monh tãgy tãnh kỹ ti kyvénh mãn ja nĩ, cabrito tãnh kỹ ke gé. Goj mãn kỹ tóg ki kujẽn ja nĩ gé, kỹ tóg tỹ kujãjãg mũ, goj mré tóg ti kujãjãg mũ

sir, carneiro kyki kusũg mré hã tóg tỹ kujãjãg mũ sir, re no fej mré hã. Kỹ tóg livro kri tỹ kó he mũ, to tỹ krig ke tóg mũ gé, povo kar to tóg tỹ kó kó he mũ gé, ag tỹ jãnhkri kỹ nỹtĩ jé. ²⁰ Ag to tỹ krig ke kar kỹ tóg ag mỹ: “Topẽ tỹ ẽg mỹ nén han ke mũ to vẽn kyvénh hã vẽ,” he mũ, “Topẽ tỹ ẽg mỹ vẽn jykre nĩm mũ to vẽn kyvénh hã vẽ,” he tóg mũ, Moisés ti. ²¹ Kar kỹ tóg ãn tỹ kur to tỹ krig ke mũ gé, pénky kar to tóg tỹ kó he mũ gé, ag tỹ Topẽ tũ han jafã kar to. Vẽn kyvénh ẽn tỹ tóg kri tỹ kó he kãn mũ, ag kar jãnhkri nỹtĩ jé. ²² Ha vé, ag tỹ vãsỹ Topẽ jykre ẽn ki nén ù tỹ jãnhkri' he sór kỹ ag tóg nén ù kyvénh hã tỹ jagnẽ jãnhkri' ti. Pir ti nĩ, ag tỹ nén ù kyvénh tũ ra tỹ jãnhkri' ke mũ ti. Hã kỹ ẽg tóg ki kanhró nỹtĩ. Ẽg tỹ Topẽ vĩ mranh kỹ tóg ẽg mỹ ẽg mẽg ter hã tugrĩn vẽn pãte fón ja nĩgtĩ, vãsỹ vẽn jykre ẽn ki.

Cristo tỹ ẽg jagfy ter pir han

²³ Vẽn jykre ẽn vỹ kanhkã tá vẽn jykre ri ke sĩ nĩ, hã kỹ vẽn mẽg kyvénh vỹ nén kar ẽn jãnhkri han ja nĩgtĩ. Ẽg tỹ hã ra kanhkã ve jé tóg há tũ nĩ, ẽg mẽg tỹ ẽg jagfy ter mũ ti. Ẽg mẽg vỹ ẽg tỹ kanhkã tá jun han ki kagtĩg nĩ. ²⁴ Cristo hã vỹ ẽg tỹ tá jun han ke mũ. Kỹ tóg ẽprã ke tỹ Topẽ jo ãn kãra rã ja tũ nĩgtĩ gé, kanhkã jykre ri ke sĩ ẽn kãra rã ja tũ ti nĩ. Kanhkã pẽ ra tóg vyr, kỹ tóg Topẽ rĩnja tá nĩ nĩ, Topẽ mré vēmén jé, ẽg jagfy. ²⁵ Kỹ ẽprã ke ẽn tóg ẽprã Topẽ tũ ki rĩr tĩ to pã'i mág ẽn tóg prỹg kar ki ag tỹ ãn vãfynyn to: Topẽ nĩgjafã, he mũ ẽn kãra tóg rã tĩ, ag mẽg kyvénh mãn kỹ tóg ra rã tĩ. Hã ra Cristo vỹ vẽn fẽg pir han. ²⁶ Ti tỹ prỹg kar ki vẽn fẽg mũ ra tóg ter tỹ hẽn ri ke han ke vẽ vẽ, Topẽ tỹ ga han

kar kÿ. Hã ra tóg vãsÿ vënh ven ja tũ nĩ. Ũri, kurã tÿ ãgno to hã tóg vënh ven pir han, kÿ tóg vënh fëg pir han, ãg tÿ Topë vĩ mranh ãn tÿ tũ' he jé, ã ter tigrĩn. ²⁷ Ęprã ke ag vÿ ter pir han tĩ gé. Ęg ter kar kÿ Topë vÿ ãg jykre tugnÿm ke mũ. ²⁸ Tag ri ke ti nĩ, Cristo tÿ vënh fëg mũ ti. Vënh fëg pir han tóg, ã tÿ ùn e tÿ Topë vĩ mranh tÿ tũ' he jé. Kejën tóg kãtĩg mãn ke mũ. Hã ra tóg ãg tÿ Topë vĩ mranh ja tigrĩn ter mãn ke tũ nĩ, ti kãtĩg mãn kÿ. Ęg jé prër jé tóg kãtĩg ke mũ, ti tÿ ù tÿ ti kãtĩg jãvãnh mũ ag jé prër jé.

10

¹ Ęg tÿ Judeu ag jykre ve kÿ ãg tóg ve sĩ han tĩ, Topë tÿ ãg mÿ nén han sór mũ ti. Prÿg kar ki ag tóg Topë mÿ tânk kÿ pũn', tânk kÿ pũn' he tĩ. Hã ra ag mÿg tÿ ag jagfy ter mũ ra tóg ag jykre há han ki kagtĩg ja nĩgtĩ. ² Ag tÿ Topë mÿ nén (ũ) pũn mũ ra ag tóg Topë vĩ mranh mãn', mranh mãn' he tĩ. Ag tÿ mranh tũ nĩ ra ag tóg ti mÿ pũn mãn ke tũ nĩ vë, ti tÿ ag mÿ vënh pãte fón jé. Hã ra ag tóg ki kanhró nÿtĩ, ag tÿ ti vĩ mranh tĩ tag, hã kÿ ag tóg ti mÿ nén pũn tovãnh tũ pë nĩgtĩ, ti tÿ ag mÿ vënh pãte fón tovãnh tũ nĩ jé. ³ Prÿg kar ki ag tóg Topë mÿ pũn tigrĩn (ag tóg) ag tÿ ti vĩ mranh ja ãn mĩ êkrég tĩ. ⁴ Hÿ, monh kyvënh vÿ ãg tÿ Topë vĩ mranh tÿ tũg' henh ke tũ pë nĩ, cabrito tÿ ãg jagfy ter mũ ãn ti ke gé. ⁵ Hã kÿ Cristo tóg, ã tÿ ga kri mur ken kÿ (tóg) Topë mÿ: “ag tÿ ãjag mÿg tânk kÿ pũn mũ ra tóg tÿ nén ù tũ nĩ ã mÿ,” he ja nĩ. “Ag tÿ ã mÿ nén ù ù pũn mũ ra tóg ã mÿ tÿ nén ù tũ nĩ gé. Hã ra ã tóg inh mÿ inh fár ti nĩm, isÿ ag jagfy ter jé. ⁶ Ag tÿ ã mÿ ag mÿg pũn mũ

ra tóg ã mÿ sér tũ nĩ, ag tÿ ã mÿ nén ũ ũ pũn mũ ra. Ag tÿ ã vĩ mranh tag tÿ tũ' he ki kagtĩg tóg nĩ, ag tÿ ã mÿ nén pũn mũ tag. ⁷ Hã kÿ sóg ã mÿ: “ha vé, sÿ ã mÿ vènh fèg ke vè,” he mũ, “isÿ ã tÿ inh ki nén ve sór mũ ãn tÿ ã mÿ han jé,” he sóg mũ. Hã kÿ tóg rán kÿ nĩ, iso, ã vĩ rá ki,” he tóg, Cristo ti, Topè mÿ.

⁸ Ti mÿ tóg tag tó vén, ha mẽ. “Ag tÿ ãjag mẽg tânk kÿ pũn mũ ra tóg tÿ nén ũ tũ nĩ ã mÿ. Ag tÿ ã mÿ ãjag mẽg pũn mũ ra tóg ã mÿ sér tũ nĩ, ag tÿ ã mÿ nén ũ ũ pũn mũ ra. Ag tÿ ã vĩ mranh tag tÿ tũg' he ki kagtĩg tóg nĩ, tag,” he vén tóg. Hã ra tóg rán kÿ nĩ, Judeu ag tÿ Topè mÿ tag pũn jé. Ge ra Jesus tóg tag to: “nén ũ tũ vè,” he ja nĩ. ⁹ Tag tó kar kÿ tóg Topè mÿ: “ha vé, sÿ ã mÿ vènh fèg ke vè, isÿ ã tÿ inh ki nén ve sór mũ ãn tÿ ã mÿ han jé,” he mũ gé, Topè mÿ. ã tÿ tag tó kÿ tóg vènh jykre si ãn tÿ tũ' he mũ, ãn tãg han jé. ¹⁰ Jesus tÿ Topè vĩ ki króm ja tugrĩn èg tóg ũri tÿ Topè krè nÿtĩ ha. Jesus Cristo vÿ èg jagfÿ ter ja nĩ, vènh fèg kÿ. Ti ter pir ki tóg èg név(e) kajãm kãn, kÿ Topè tóg èg mÿ vènh pãte fón kãn mũ sir.

¹¹ Èprã ke ag tÿ Topè tũ ki rĩr tĩ ag vÿ kurã kar ki ãjag rãnrãj han tĩ, Topè tũ ki rĩr jé. Kurã kar ki ag tóg Topè mÿ ãjag mẽg tânk kÿ pũn tĩ, hã ra ag tÿ Topè mÿ nén pũn mũ ãn pi(jé) ag tÿ Topè vĩ mranh tÿ tũ' he ja nĩgtĩ. ¹² Ag jãvo Jesus Cristo vÿ vènh fèg pir han, ã ter tugrĩn tóg èg tÿ Topè vĩ mranh ãn tÿ tũ' he kãn. Tag han kar kÿ tóg Topè pègja tá nĩ nĩ. ¹³ Tá tóg nĩ nĩ. Topè vÿ ti kato vãsãnsãn mũ ag tÿ ti pèn krèm vin ke mũ. Ag sigse kÿ nÿtĩ to ken hã vè. Tag hã jãvãnh tóg nĩ nĩ, Jesus ti. ¹⁴ Ti tÿ vènh fèg pir ãn tugrĩn tóg Topè krè kar ag krenkren han kãn huri, kÿ èg Topè mÿ sĩnvĩ nÿtĩ. ¹⁵ Topè kuprĩg vÿ èg

mỹ tag tó tĩ gé. Tag tó tóg mũ, ha mẽ. ¹⁶ “Tag pãte sóg ag mỹ vênh jykre tãg han ke mũ,” he tóg, ẽg jóg mág ti. “Vênh jykre tãg ẽn hã vễ, ha mẽ. Isỹ nẽn to ag jyvẽn mũ ẽn tỹ sóg ag fe kãkã nĩm ke mũ, kỹ tóg sỹ ag krĩ ki rãn ri ke nĩnh mũ sir, kỹ ag tóg han sór ke mũ,” he tóg. ¹⁷ Tag tó kar kỹ tóg tag tó gé, ha mẽ. “Ag tỹ inh vĩ mranh ja ẽn mĩ ẽkrén mãn ke tũ inh nĩ ha, ag jykre pãno ẽn mĩ ẽkrén mãn ke tũ pẽ inh nĩ ha,” he tóg mũ gé. ¹⁸ Ha vé, Topẽ tỹ ẽg mỹ vênh pãte fón kỹ ẽg tóg ti mỹ nẽn ù pũn mãn ke tũ nĩ ha, ti tỹ ẽg mỹ vênh pãte fón kãn kỹ nĩn kỹ, ẽg tỹ ti vĩ mranh ja kar ẽn ti.

Ẽg tỹ Topẽ to krónh ke tũ

¹⁹ Inh kankã, Jesus tỹ ẽg jagfy ter tugrĩn ẽg tóg jatun mỹ Topẽ nĩgafã tá jun ke mũ. ²⁰ Jesus tỹ ẽg jagfy ter ẽn tóg ti tỹ kur tỹ jãnkã ẽn fĩn rãm ri ke nĩ, ẽg tỹ ti nón fĩn rãm ri ke han jé, ẽg rĩnrĩr nỹtĩ jé. Topẽ jô ãn krẽm kur tỹ jãnkã nĩfe ẽn vỹ jaran ke kỹ sa nĩ, Jesus ter kỹ. Kỹ ẽg tóg rã genh há nỹtĩ ha. ²¹ Ẽg jagfy Topẽ tũ ki rĩr tĩ to pã'i mág vỹ nĩ nĩ, hã vỹ: Jesus, he mũ. Topẽ jamã tá ke ẽn ag kar kri ke vỹ tỹ ti nĩ. ²² Kỹ jatun mỹ Topẽ mré vēmén nĩ. Ti ki rã há han nĩ, ãjag fe tỹ ti ki gemnĩ, ãjag tỹ ti nĩgafã tá junjun jé. Ón kỹ ti ki ge sór tũg nĩ. Ẽg jãnhkri han tóg, ẽg jykre pãno kar tỹ tóg tũ' hé, ẽg tỹ to jykrén mãn tũ nĩ jé. Ẽg tỹ jãnhkri han tóg, ẽg tỹ goj jãpri tỹ vênh kype ẽn ri ke, kỹ ẽg há nỹtĩ. ²³ Ti tỹ ẽg mỹ nẽn tó mũ ẽn mĩ ẽkrén nĩ, to krónh ke tũg nĩ, sỹ ãjag mỹ nẽn tó mũ ẽn to. Ve jé ẽg tóg ke mũ, ti tỹ ẽg mỹ nẽn tó mũ ẽn ti. Ẽ tỹ ẽg mỹ tó ja ẽn vỹ ón vãn nĩgtĩ, hã kỹ to krónh ke tũg nĩ.

²⁴ Jagnē mī ēkrén nī, ājag tỹ jagnē jyvēn jé. “Vēnh kar to há nīmñī,” hemñī jagnē mỹ. “Nén ũ há kar han nī,” hemñī gé jagnē mỹ. ²⁵ Ũ ag tóg culto venh kāmũ vānh nỹtĩgtĩ. Tag han tũg nī. Culto venh kāmũmnī. Kỹ jagnē jyvēn nī, ājag tar nỹtĩ jé. Kakó ti nī, ti kātĩg mǎn ke kurā ti. Ve há ti tĩ ha, tag.

²⁶ Ha vé, Topē vī mẽ kǎn ěg huri. ěg tỹ ti ki rǎ kar kỹ culto venh kātĩg tũ nī' hen kỹ, ěg tỹ ge ra Topē vī mranh sór kỹ mranh tĩ kỹ tóg ũ tỹ ěg jagfy kajām mǎn ke tóg tũ tĩ. ²⁷ Hỹ, ěg tỹ mranh sór kỹ mranh kỹ Topē vỹ ěg vóg kónǎn pē han ke mũ. Pĩ tỹ tóg ag tỹ tũ' henh ke mũ, Topē ti, ũ tỹ ti kato vāsǎnsǎn mũ ag. ²⁸ Ũ tỹ Moisés tỹ ěg jyvēn mũ ěn mẽ jāvǎnh nī ěn tén ja ag tóg nĩgtĩ, Israel ag, ũn régre ag tỹ ti jykre pǎno ve ja tag tigrĩn, ke tũ nĩn kỹ ũn tǎgtũ ag. Ti jagǎgtǎn ja tũ ja ag nĩgtĩ, ũn jykre pǎno ěn. ²⁹ Hǎ ki ěg tóg vég mũ, Topē tỹ ěg vóg kónǎn pē han ke mũ ti, ěg tỹ Topē kósin to é he kỹ, ěg tỹ ti vī mranh sór kỹ. ěg tỹ mranh sór kỹ ěg tóg ti kyvénh to é he tĩ, ti jykre to. Ti tỹ ěg jǎnhkri han ja ěn to é he ěg tóg tĩ sir. ěg mỹ tóg tỹ nén ũ tũ nī sir, Topē kuprĩg tỹ ěg jagǎgtǎn ja ěn ti. Ũ tỹ tag han mũ vóg kónǎn jé tóg ke mũ, Topē ti, ha vemñī. ³⁰ Hǎ kỹ tóg tag tó, ha mẽ: “ũn jykre pǎno ag vóg kónǎn jé sóg ke mũ, ag tỹ kajām jé, ag tỹ nén ũ kórég han mũ kar,” he tóg, Topē ti. Ũ tỹ tag tó mũ ki kanhró ěg tóg nī mỹr. Hǎ ra tóg tag tó gé, ha mẽ. “ǎ mré ke ag jykre tugñỹm jé tóg ke mũ, ěg jóg mág ti,” he ja tóg nī gé. ³¹ Rĩr ti nī, Topē ti. Ti tỹ ěg to jũ nĩn kỹ tóg jagy tǎvĩ tĩ, nén ũ jagy kar kǎfór ti nī.

Ěg tỹ to tar nỹtĩnh ke

32 Ājag tỹ vāsỹ ti mỹ vēnh fēg vén ja ěn kurā mĩ ěkrén nĩ. ěn kã ag tóg ājag kato vāsānsān mág, kỹ ājag tóg ag to vēsỹrénh, kysā tỹ hēn ri ke ki, ājag tỹ Topē vĩ mẽ vén ěn kã. Hã ra ājag tóg to krónh krónh ke ja tũ nĩgtĩ. 33 Ājag kã ũ to ag tóg vĩ kónān mág' he ja nĩgtĩ, ěn kã, Topē kato vāsānsān mũ ag, kỹ ag tóg ājag vóg kónān gé, hã ra vēnh kar vỹ vé, ag tỹ ājag vóg kónān ja ti. Ājag kã ũ vóg kónān ja ag tóg nĩgtĩ, kỹ tóg ājag kar mỹ jagy tĩ ja nĩgtĩ, ag mré, ājag tỹ tỹ ag mré Jesus ki ge nỹtĩn kỹ. 34 Kỹ ag tóg ājag kã ũ sigse ja nĩ gé. Kỹ ājag tóg ũn sigse kỹ nỹtĩ ěn ag jagāgtān ja nĩgtĩ, ag tỹ ājag mré Jesus ki ge kỹ nỹtĩ kỹ. Pã'i ag tỹ ājag tỹ nén gég mũ ra tóg ājag mỹ sér nĩ ja nĩgtĩ. Ājag tỹ kanhkã tá nén ũ há tãvĩ ěn venh ke hã mĩ ājag tóg ěkrén ja nĩgtĩ, ag tỹ ājag tỹ nén génh kỹ, Jesus tugrĩn. Ājag tỹ kanhkã tá nén venh ke ěn vỹ tũ' henh ke tũ pē nĩ. 35 Kỹ ũri to krónh ke tũg nĩ gé. Ājag tỹ ti to tar nỹtĩn kỹ ājag tóg nén ũ há tãvĩ venh ke mũ, ha mẽ. Ājag vēsỹrénh ja ěn kaja ri ke ve jé ājag tóg ke mũ. 36 Ęg tỹ ti tũ han to tar nỹtĩnh ke vē, ěg tỹ ti tovānh ke tũ pē nỹtĩnh ke vē. Tag hã vỹ há nĩ. Kỹ ājag tỹ Topē tỹ ěg mỹ nén tó mũ ěn han kãn kỹ nỹtĩn kỹ ājag tóg venh ke mũ, ti tỹ ěg mỹ nén (ũ) ven ke mũ ěn ti. 37 Hã kỹ tag vỹ rán kỹ nĩ, Topē vỹ rán ki, ha mẽ: “kãnhmar pē ti jun ke mũ, ũn kãtĩg ke mũ ěn ti. Kãtĩg mé han jé tóg ke mũ, ha vemnĩ. 38 Kỹ ũ tỹ inh ki ge kỹ nỹtĩ ěn ag hã vỹ krenkren ke mũ, inh mré ke ěn ag, isỹ ũn mỹ vēnh pãte fón mũ ěn ag. Jãvo ũ tỹ isovānh mũ ěn vỹ inh mỹ kórég nĩnh mũ,” he tóg, Topē ti. 39 Ęg pi(jé) ti tovānh ke mũ', kỹ ěg tóg ũ tỹ ti tovānh mũ ěn ag vãgfor ěn ri ke han ke

tũ nĩ gé. Ti ki rã kÿ ěg tóg nÿtĩ, hã kÿ ěg krenkren ke mũ.

11

Ū tÿ ěg jo Topě ki ge kÿ nÿtĩ ag

¹ Topě ki rã to ken hã vĕ, hã vÿ: ti tÿ ěg mÿ nén tó mũ ěn kri nĩm, he mũ. Ti tÿ nén ū to: “ve jé ājag tóg ke mũ,” he mũ ěn kri fi jé ěg tóg ke mũ, ěg tÿ ver vég tũ ra. ² Ti si ag vÿ kri nĩm kÿ ti ki ge ja nĩgtĩ gé. Hã kÿ ag tóg Topě mÿ tÿ ũn há ja nÿtĩgtĩ, vãsÿ ke ag, ha mẽ.

³ Ěg tÿ Topě ki rã kÿ ěg tóg ki kanhró nÿtĩ, ti tÿ ā vĩ tÿ ěg tÿ nén vég mũ kar hyn han ja ti. Ti vĩ vég tũ ěg tóg nĩgtĩ, kÿ tóg ěg tÿ nén vég tũ tÿ tóg ěg tÿ vég mũ hyn han ja nĩgtĩ, Topě ti, ā vĩ tÿ tóg nén kar hyn han ja nĩgtĩ.

⁴ Kÿ Abel vÿ Topě ki rã kÿ nĩ ja nĩgtĩ gé, hã kÿ tóg Topě mÿ pũn há han, ti tÿ ti mÿ ā mĕg pũn kÿ. Jãvo ti kãke tÿ Caim vÿ ti ki rã ja tũ nĩ, kÿ tóg Topě mÿ nén ū pũn tĩ (hã) ra (tóg) ti mÿ pũn kónãn. Abel tÿ Topě ki rã kÿ tóg Topě mÿ pũn há han ja nĩ, Abel tÿ ti mÿ pũn mũ ěn ti. Topě tÿ Abel to: “inh mÿ tóg tÿ ũn jykre kuryj nĩ,” he ja vĕ, hã kÿ ti tũ tóg pũr há han. Ter ti huri, Abel ti, hã ra ěg tóg ti tÿ nén han ja tugrĩn Topě ki ge ki kanhrãn mũ sir.

⁵ Enoque vÿ Topě ki rã kÿ nĩ ja nĩgtĩ gé, hã kÿ Topě vÿ ti jé prĕr, ti tÿ kanhkã ra tĩg jé, ti rĩr ra, ti ter tũ ra. Ti ve mãn tũ ag tóg, Topě tÿ ti jé prĕr kar kÿ, hã ra tóg ā ter tũ ra kanhkã ra vyr. Topě tÿ ti jé prĕr to hã tag vÿ ti to rán kÿ nĩ Topě vĩ tÿ rán kÿ nĩ ki, ha mẽ: “Topě tÿ ti jykre ve kÿ ti fe tóg mrin ke mũ,” he ja ti nĩ, Enoque to. ⁶ Ěg tÿ Topě ki ge tũ nÿtĩn

kỹ tóg ěg to há nĩnh ke tũ nĩ, Topě ti. Ěg tỹ Topě ra mũ sór kỹ ěg tóg tag to jykrén ke mũ, ha mẽ. “Topě vỹ nĩ,” he jé ěg tóg ke mũ. Kỹ ěg tóg ti to: “ěg tỹ ti to mũ kỹ tóg ěg mỹ nén ũ há ěn nĩm ke mũ, ti tỹ ěg mỹ nén tó ja ěn ti,” henh ke mũ gé. Tag tó kỹ ěg tóg ti to mũnh ke mũ, kỹ tóg ěg mỹ han ke mũ, ha vemnĩ.

⁷ Noé vỹ Topě ki rã kỹ nĩ ja nĩgtĩ gé, hã kỹ Topě vỹ ti mỹ tó ja nĩ, ag kar tỹ kar kỹ ti jagy venh ke ti, hã vỹ: ta kutě, he mũ. Kỹ tóg Topě vĩ kri fi kỹ canoa mág ěn han mũ, kỹ tóg han kãn kar kỹ (tóg) ki rã kỹ (tóg) kren mũ, ti prũ fi mré, ti krě mré ke gé. Topě ki rã kỹ tóg ũ tỹ Topě kato vãsãnsãn mũ ag mré tĩg mãn ja tũ nĩ. Hã kỹ Topě vỹ ti mỹ ũn jykre kuryj ag tỹ nén venh ke ěn ven, ti tỹ ũ tỹ ti ki rã kỹ nỹtĩ ag mỹ nén ven ke ěn tĩ.

⁸ Abraão vỹ Topě ki rã kỹ nĩ ja nĩgtĩ gé, hã kỹ tóg Topě vĩ kri nĩm ja nĩgtĩ. Topě tóg ti mỹ: “ha tĩg,” he mũ, kỹ tóg tĩg ja nĩ, ga ũ ra, Topě tỹ ti mỹ ga nĩm ke mũ ěn ra. Ả tỹ ki kagtĩg ra tóg ra tĩg ja nĩ. Ả jamã tá kãkutě kỹ tóg ả tỹ ki kagtĩg ěn ra vyr, Abraão ti. ⁹ Topě ki rã kỹ jě kỹ tóg ga ěn mĩ tĩg ja nĩgtĩ. Topě tỹ ti mỹ ga ěn nĩm sór ja vễ, hã ra tóg tỹ ả tũ tũ ra tóg mĩ tĩg ja nĩgtĩ, tá. Kur tỹ ĩn krēm ěmãn kỹ tóg ga ěn mĩ tĩg ja nĩgtĩ, ti kósin tỹ Isaque mré, Isaque kósin tỹ Jacó mré ke gé. Ti krě'krě ag vỹ ti mré ga ěn venh ke ja nỹtĩ gé, hã kỹ Topě tóg Abraão mỹ tó ja nĩ, hã ra ag tóg ver vég tũ nĩ. ¹⁰ Ge ra tóg tovãnh ja tũ nĩgtĩ. Cidade tỹ Topě tũ ěn ve sór ja ti nĩ, ũ tỹ tũg ke tũ pẽ ěn. Topě hã vỹ cidade ěn han. To jykrén kỹ tóg han. Ti pi(jé) ěprã ke ag cidade ri ke nĩ'. Ěn ve sór kỹ tóg ti tovãnh ja tũ pẽ nĩ, hã kỹ tóg vé, Abraão ti.

¹¹ Sara fi vỹ Topě ki rã kỹ nĩ ja nĩgtĩ gé, hã kỹ fi

tóg ã kófa pẽ ra (fi tóg) kufyg ja nĩgtĩ, Topẽ tỹ fag tỹ tag to tar han kỹ, Sara fi, fi mén tỹ Abraão mré. Ú tỹ fag mỹ: “kósin ve je ájag tóg ke mũ,” he mũ ên vĩ kri fi kỹ fag tóg ve ja nĩgtĩ. ¹² Hã kỹ ùn pir ên, ùn kófa pẽ ên krẽ'krẽ vỹ e tãvĩ nỹtĩ, krĩg e ên ri ke, goj fyr mĩ rỹnhryj e ên ri ke, goj kafã tũ fyr ên mĩ rynthryj e ên ri ke.

¹³ Topẽ ki ge kỹ nỹtĩn kỹ ag kãgter, Abraão, Isaque, Jacó. Topẽ vỹ ag mỹ ga ên tó ja nĩ, hã ra ag tóg ve ja tũ nĩ ver. Ájag tỹ ve pẽ han tũ ra ag kãgter. Ve sĩ han ja ag tóg nỹtĩgtĩ, Topẽ tỹ ag mỹ ga tó ja ti, hã ra ag tóg ve pẽ han ja tũ nĩ kỹ tóg ag mỹ êg tỹ kór há tá nèn ù vég mũ ri ke nĩ ja nĩgtĩ. Ag tỹ venh ke to tóg ag mỹ sér gy tí hã ra. “Tag ki, ga kri êg tóg ùn pygsa mũ ên ri ke han tĩ, êg jamã vỹ tỹ tag ki ke tũ nĩ,” he ag tóg tĩ. ¹⁴ Ag jamã pẽ jãvãnh kỹ ag tóg ga kri mũ ja nĩgtĩ, hã kỹ ag tóg: “êg jamã pẽ tũ vè, tag ki,” he ja nĩgtĩ. ¹⁵ Ag pi(jé) ájag jamã si ên ra vỹn vỹn ke sór ja nĩgtĩ', hã kỹ ag tóg vỹn vỹn ke ja tũ nĩ. ¹⁶ Êmã há pẽ ên ve sór ja ag tóg nĩgtĩ, kanhkã tá. Hã kỹ ag tóg Topẽ mỹ há ja nỹtĩ, ti pi(jé) ag to mỹ'ãg ke mũ'. Hã kỹ tóg vẽso: “Abraão Topẽ, Isaque Topẽ, Jacó Topẽ vỹ tỹ inh nĩ,” he tĩ, Topẽ ti. Cidade han tóg, ag mỹ, kanhkã tá.

¹⁷ Abraão vỹ Topẽ ki rã kỹ nĩ ja nĩgtĩ gé, hã kỹ tóg Isaque nenh ja tũ nĩgtĩ. Topẽ mỹ tóg ti fẽg, Topẽ tỹ ti mỹ ti kósin to vĩn kỹ. Ti kósin pir ja vè, hã ra tóg ti tãnh kren, Topẽ mỹ. ¹⁸ Topẽ tóg Abraão mỹ: “ã kósin tỹ Isaque krẽ vỹ e nỹtĩnh mũ,” he ja nĩgtĩ. ¹⁹ Kỹ tóg, ti tỹ ti tãnh kren kỹ tóg: “Topẽ hỹn ti rĩn mãn ki kanhró nĩ, isỹ ti tén kỹ,” he mũ. Hã kỹ tóg ti ve mãn gé. Ti tỹ ti tãnh kren kỹ tóg Topẽ mỹ ti tỹ ti

tãnh ri ke nĩ ja nĩgtĩ, hã ra tóg ti ve mãn, Topẽ tỹ ti mỹ: “ti tãnh tũg ra,” hen kỹ.

²⁰ Isaque vỹ Topẽ ki rã kỹ nĩ ja nĩgtĩ gé, hã kỹ tóg Jacó mỹ vĩ há han, Esáu mỹ ke gé, ti tỹ ag mỹ ag tỹ nén venh ke ẽn tó kỹ.

²¹ Jacó vỹ Topẽ ki rã kỹ nĩ ja nĩgtĩ gé, hã kỹ tóg ã ter ke to hã (tóg) José krẽ régre ẽn ag mỹ vĩ há han gé. Kỹ tóg ã vátó to jẽ kỹ (tóg) Topẽ krẽm mũg ke mũ, kỹ tóg Topẽ mỹ: “Topẽ vỹ tỹ ã nĩ,” he ja nĩ.

²² José vỹ Topẽ ki rã kỹ nĩ ja nĩgtĩ gé, hã kỹ tóg ã ter ke nỹ ra tóg ã ter ken jo (tóg) Israel ag mỹ kãmén ja nĩgtĩ, ag krẽ'krẽ ag tỹ ga tỹ Egito tá kãpanh ke ẽn ti. Kỹ tóg ag tỹ kãpanh ke ẽn tó kỹ (tóg) ag mỹ to vĩ ja nĩ, ag tỹ ti kuka gé kãmũnh jé, ag kãmũnh ken kỹ.

²³ Moisés han mũ fag vỹ Topẽ ki ge kỹ nỹtĩ gé, hã kỹ fag tóg Moisés péju, ti mur kar kỹ, kysã tãgtũ ki. Fag mỹ tóg sĩnvĩ nĩ ja nĩgtĩ, gĩr sĩ ti. Kỹ fag tóg pã'i mág kamẽg sór ja tũ nĩ, pã'i mág tỹ: “gĩr gré ag kãgtén kãn nĩ,” he mũ ra.

²⁴ Moisés vỹ Topẽ ki rã kỹ nĩ ja nĩgtĩ gé, hã kỹ tóg, ã mog kar kỹ (tóg): “inh pi(jé) tỹ Faraó kósin fi kósin nĩ,” he ja nĩgtĩ. ²⁵ Ti tỹ Topẽ povo ag mré jagtar nĩ ra tóg ti mỹ tỹ nén ù tũ nĩ ja nĩgtĩ. Hã ra tóg Egito tá ke ag mré rico nĩ sór ja tũ nĩgtĩ. Topẽ vĩ mranh kỹ ag tóg ón kỹ rico nỹtĩ ja nĩgtĩ, Egito tá ke ag. ²⁶ Ëg tỹ Cristo tugrĩn jagtar nỹtĩ tag tóg ti mỹ ẽg rico nỹtĩ tag há kãfór nĩ ja nĩgtĩ, hã kỹ Egito tá ke ag rico tag tóg ti mỹ kórég ja nĩgtĩ, Moises mỹ. Topẽ tỹ kanhkã tá ẽg mỹ nén ù há nĩm ke ẽn hã to tóg jykrén ja nĩgtĩ.

²⁷ Moisés vỹ Topẽ ki rã kỹ nĩ ja nĩgtĩ, hã kỹ tóg ga tỹ Egito tá kãkutẽ ja nĩgtĩ, pã'i jũ kamẽg vãn h nĩn kỹ. Topẽ vég tũ ẽg tóg nĩgtĩ, hã ra tóg Topẽ hã ki ẽkrén

kỹ nĩ ja nĩgtĩ. Ti vĩ tóg ti mỹ ti tỹ ti vég nĩ ri ke nĩ ja nĩgtĩ. Hã kỹ tóg krónh ke ja tũ nĩgtĩ, Moisés ti.

²⁸ Moisés vĩ Topê ki rã kỹ nĩ ja nĩgtĩ, hã kỹ tóg Israel ag mỹ festa tỹ Páscoa ên nĩm. Ag mỹ tóg: “ĩn jãnkã to tĩn, ovelha kyvénh tỹ,” he mũ, “Topê tỹ jẽnẽ jafã tỹ ãjag krẽ ve ag kãgtén tũ nĩ jé,” he ja tóg nĩgtĩ, Moisés ti, Israel ag mỹ. Hã kỹ ag tóg festa tỹ Páscoa ên han tĩ, ũri.

²⁹ Israel ag vĩ Topê ki ge kỹ nỹtĩ ja nĩgtĩ gé, hã kỹ ag tóg goj kusũg he mũ ên kã rêgrêg há han inhhã, êg tỹ ga kri mũ ên ri ke han ag tóg. Mrinmrér ja tũ ag tóg nĩgtĩ. Egito tá ke ag tỹ ag nón kã rêgrêg sór mũ ra tóg ag kri rũm ke mũ sir, goj ên ti, kỹ ag tóg nỹgnỹr kỹ kãgter kãn mũ sir.

³⁰ Israel ag vĩ Topê ki ge kỹ nỹtĩ ja nĩgtĩ gé, hã kỹ cidade tỹ Jericó jy ró ên vĩ vêsóg ki kórég kãn ja nĩgtĩ. Ag tỹ pênĩn mũ tỹ 7 (ke) han kar kỹ tóg vêsóg ki kórég ja nĩ, ag tỹ kurã tỹ 7 (ke) ki pênĩn mũ kar kỹ.

³¹ Raabe fi vĩ Topê ki rã kỹ nĩ ja nĩgtĩ gé. Ũn mén (ka)mê vĩ tỹ fi nĩ ja nĩgtĩ, hã ra fi tóg Topê ki rã. Hã kỹ fi tóg Israel ag mỹ: “ha kãge jêg,” he ja nĩ, ũ tỹ fi jamã venh kãmũ mũ ag. Hã kỹ ag tóg fi tén ja tũ nĩ gé. Cidade tá ke kar kãgtén ja ag tóg nĩgtĩ, ag tỹ Topê vĩ mẽ sór ja tũ tugrĩn, hã ra fi tóg inhhã kren ja nĩgtĩ.

³² Inh hỹn ũ tónh ke mũ gé ver'. Isỹ ag tó kãn sór mũ ra tóg inh mỹ vẽnhmỹ tĩ. E ag nỹtĩ, e tãvĩ, Gideão ti, Baraque ti, Sansão ti, Jefté ti, Davi ti, Samuel ti, Topê vĩ tó tĩ kar ag. ³³ Topê ki ge kãn kỹ ag nỹtĩ, hã kỹ ag tóg pã'i ag mré vênh génh han, hã ra ag tóg pã'i ên ag tỹ hẽn ri ke kãn. Vênh jykre kuryj han ag

tóg tí, vènh kar mÿ. Kÿ Topê tóg ag mÿ ã tÿ ag mÿ vènh jykre há tó mũ ên tÿ ag mÿ ven mũ sir. Mÿg tÿ ù măn sór mũ ra tóg ti tÿ hê ri ke ja tũ nÿgtĩ gé, mÿg ti. ³⁴ Pĩ gru jagy ên vÿ ag tÿ hê ri ke ja tũ nÿgtĩ gé, ù tÿ Topê ki ge kÿ nÿtĩ ag. Û tÿ rógro tÿ ag tén sór mũ ra tóg ag tÿ hê ri ke ja tũ nÿgtĩ gé. Ag krój nÿtĩ ra ag tóg tar gy nÿtĩ ja nÿgtĩ. Vènh génh han kÿ ag tóg rará há han, kÿ ag tóg ag kato vāsānsān mũ ag tÿ pétê han gé. ³⁵ Ûn tÿtá ù fag vÿ, ãjag krê ter kar kÿ fag vÿ ag ve măn, ag tÿ ag rĭn măn kÿ, Topê ki ge kÿ nÿtĩ ên ag.

Hã ra ag kato vāsānsān mũ ag vÿ ag to jũ mág, kÿ ag tóg ag kāmĩ ù ag vóg kónān gé. Kÿ ag tóg ag kygrêg gé, ù tÿ Topê ki ge kÿ nÿtĩ ag, ag tÿ Topê to jũ kÿ, ù tÿ ag kygrêg mũ ag. Ag mÿ ag tóg: “ãjag tovānh jé êg tóg ke mũ, ãjag tÿ Topê tovānh kÿ,” he ja nÿgtĩ, hã ra ag tóg Topê tovānh sór ja tũ nĩ. Ag tÿ kanhkā tá rĭnrĭr nÿtĩ sór ja vê, hã kÿ ag tóg Topê tovānh ja tũ nĩ. ³⁶ Ag kāmĩ ù ag to ag tóg é he mũ gé, kÿ ag tóg ag mrānmrān gé, ag sigse ag tóg, ke gé, kÿ ag tóg vèse jafā kátá ag vām gé. ³⁷ Pó tÿ ag pin kÿ ag tóg ag kãgtén gé, ránran jafā tÿ ag tóg ag ránran gé, serrote tÿ. Rógro tÿ ag tóg ag kãgtén gé, Topê ki ge kÿ nÿtĩ ag. Ag tÿ hê mĩ mũn kÿ ag tóg carneiro fár tÿ kur rĭnh ja nÿgtĩ, cabrito fár tÿ kur ke gé, ag tÿ Topê ki ge tigrĭn jagtar nÿtĭn kÿ. Vējēn ve ja tũ ag tóg nÿgtĩ kejēn, jagãgtar ag tóg nÿtĩ, ag vóg kónān ja ag tóg nÿgtĩ gé. ³⁸ Ag mré ke ag vÿ kórég pē nÿtĩ ja nÿgtĩ, hã kÿ ag tóg ùn há tag ag to kórég nÿtĩ ja nÿgtĩ. Kÿ ag tóg ga kórég kri mũ ja nÿtĭgtĩ, ag jo pétê kÿ, sór kri ag mũgtĩ, kÿ ag tóg pānónh nor kãki nÿtĩ ja nÿgtĩ gé, ga nor kãki ke gé, ù tÿ Topê ki ge kÿ nÿtĩ ag. Êprã ke

ag vỹ ag to jũ mág nỹtĩ ja nĩgtĩ.

³⁹ Ag tỹ Topẽ ki ge kỹ nỹtĩn kỹ tóg hã ra ag to há nĩ, Topẽ ti. Hã ra ag tóg tag ki ve ja tũ nĩ ver, ag tỹ nén ve sór mũ ãn ti, Topẽ tỹ ag mũ nén tó ja ãn ti.

⁴⁰ Topẽ vỹ ãg to jykrén ja nĩ gé, hã kỹ tóg ver ag mũ ven ja tũ nĩ. Ti tỹ ãg mré ag mũ ven sór vỹ, ãg tỹ jagnẽ mré kanhkã tá junjun jé.

12

Topẽ tỹ ãg kanhrãn sór mũ

¹ Ha vé, e tãvĩ ag nỹtĩ, ù tỹ ãg jo Topẽ tovãnh tũ ag. ãg pẽnĩn ag e nỹtĩ, ãg ve kỹ. Kỹ tóg há tĩ, ãg tỹ Topẽ japry jagma mũ há han ke ti, ti jamĩn jagma. ãg tỹ corrida han ri ke ti nĩ. ãg tỹ tỹ vaj kỹ corrida han ken kỹ ãg tóg vẽnkhán há han ke mũ. “Sỹ tag han kỹ inh mũ corrida to krónh kenh ke tũ nĩ vỹ?” he ãg tĩ. “Ne nỹ isar han mũ, corrida to?” he ãg tóg tĩ gé. ãg tỹ nén han ke mũ ãn tovãnh ãg tóg tĩ, ãg tỹ corrida to krónh ke tũ nĩ jé. Topẽ jykre ri ke ti nĩ, tag ti. “Tag mũ Topẽ to isar han mũ vỹ?” hemnĩ, ãjag tỹ nén han ke mũ ãn kar to. ãjag tỹ nén han ke mũ tugrĩn ti to tar nỹtĩn kỹn há tĩ. ãjag tỹ nén han ke mũ ãn tugrĩn ti to krónh kenh ha mẽ tĩn kỹ han tũg nĩ, tovãnh nĩ. Ti vỹ mranh sór tũg nĩ gé. Tag vỹ ãg kókén pẽ han tĩ. ãjag tỹ nén han tĩ tag kar tovãnh kỹ ãjag tóg ti jykre hã to krónh kenh ke tũ pẽ nĩ. ² Jesus hã mũ ãkrén nĩ, ti jykre hã tỹ krĩn kỹ nỹtĩmnĩ. Ti hã vỹ ãg tỹ Topẽ ki rã han, kỹ tóg ãg tỹ ti tovãnh ke tũ han ãn ki kanhró nĩ gé. Cruz to sa kỹ tóg ter mũr, ag tỹ ti to é he mũ ra tóg ti mũ tỹ nén ù tũ tĩ. Ti tỹ kar kỹ nén venh ke ãn mũ tóg ãkrén ja nĩ, nén tỹ ti

mỹ sér nĩnh ke ẽn mĩ. Hã kỹ tóg ùri Topê pẽgja tá nĩ nĩ.

³ Jesus mĩ ẽkrén nĩ. Ẽprã ke kar ag vỹ ti kato vĩ ja nĩgtĩ, ù tỹ Topê vĩ mranh mũgtĩ ẽn ag, ge ra tóg Topê to krónh ke ja tũ nĩgtĩ, Jesus ti. Ti ki ẽkrén kỹ to krónh krónh ke tũg nĩ, to: “ron inh mũ,” he tũg nĩ gé.

⁴ Ha vé, Topê vĩ mranh tũg nĩ. Ẽjag tỹ ti vĩ mranh sór mũ tag kato vãsãnsãn nĩ, ke tũ nĩ (mũ) ra ẵjag tóg to ter mũ. ⁵ ẵjag mỹ Topê tỹ ẽg jyvẽn ẽn kã jatú? Ẽg jyvẽn kỹ tóg tag tó, ha mẽ. Ặkrẽ mỹ tóg tag tó, Topê ti, ha mẽ: “inh kósin, isỹ ẵ vóg kónãn kỹ inh mỹ vẽn nenh tũg nĩ,” he tóg. “Isỹ ẵ mỹ vĩ tar han mũ ra to krónh ke tũg nĩ. ⁶ Isỹ ẵ to há nĩn kỹ, hã kỹ sóg ẵ mỹ vĩ tar han tĩ. Ặkanhrãn jé ke vẽ. Isỹ ẵ mỹ: “inh kósin vỹ tỹ ẵ nĩ,” hen kỹ sóg ẵ mrãnmrãn tĩ gé, ẵ kanhrãn tĩ jé,” he tóg, Topê vĩ tỹ rán kỹ nĩ ki.

⁷ Hã kỹ ti tỹ ẵjag mrãnmrãn tag to tar nỹtĩmĩ. Ặjag kanhrãn jé ke vẽ. Topê tỹ ẵjag mỹ: “inh krẽ,” he vẽ. Ẽg panh vỹ ẽg mrãnmrãn kỹ ẽg kanhrãn ja nĩgtĩ gé. Vẽn kar jykren hã vẽ. Topê vỹ ẵ krẽ kar mrãnmrãn kỹ ag kanhrãn tĩ. ⁸ Kỹ, ti tỹ ẵjag mrãnmrãn tũ nĩ ra ẵjag pi(jé) tỹ ti krẽ pẽ nỹtĩnh mũ vẽ'. ⁹ Ha vé, ẽg han mũ fag vỹ ẽg mrãnmrãn tĩ, ẽg kanhrãn jãvãn nĩn kỹ, kỹ ẽg tóg fag kamẽg tĩ. Kỹ ẽg tóg Topê kamẽg kãfór han ke mũ, ù tỹ ẽg rĩnrĩr han mũ ti, ẽg jóg mág ti. ¹⁰ Kỹ ù tỹ ẽg han mũ tóg ẽg to ẵ jykre fi ja nĩgtĩ. To jykrén kỹ tóg ẽg mrãnmrãn tĩ kejẽn, ẽg sĩn kã. Kejẽn tóg ẵ tỹ kygnẽ kỹ nĩ ra ẽg kanhrãn sór tĩ gé, ẽg panh ti. Hã ra Topê tỹ ẽg mrãnmrãn kỹ tóg to jykrén há han tĩ inhhã. Ti tỹ ẽg kãnhrãn há han sór vẽ, ẽg tỹ ti ri kén kygnég tũ nĩ

jé, ěg tỹ ti ri kén há tãvĩ nỹtĩ jé. ¹¹ Ti tỹ ěg mrãnmrãn ěn kã tóg ěg mỹ sér tũ nĩ ver. Ěn kã tóg ěg mỹ jagy tĩ. Kar kỹ ěg tóg vãhã vég tĩ, ti há nĩ ja ti, ěg tỹ kanhrãn há han kar kỹ. Ti tỹ ěg mrãnmrãn hã kỹ ěg tóg vėnh jykre há han ěn ki kanhrãn mũ sir, jagně krĩ kuprãg ki ěg kanhrãn mũ gé sir.

Ěg tỹ jagně tar han ke

¹² Krónh ke ve ãjag tóg nĩ, kỹ ãjag tóg tỹ ùn kaga tĩg kórég ěn ri ke nỹtĩ. To tar' he mãn nĩ, ãjag tỹ mũ há han mãn jé. ¹³ Topě japry kuryj hã jagma ěvãnh nĩ, kỹ ù tỹ ãjag mỹ to krónh ke ha mẽ ěn ag vỹ ãjag mré to tar' he mãn mũ gé. Topě jykre tovãnh sór nĩ ve ãjag nỹtĩ, hã ra tóg ãjag tar han mãn sór mũ.

¹⁴ Vėnh kar mré vėnh jykre kuryj han sórmnĩ. Kỹ Topě vĩ ki króm kỹ kygně sór tũg nĩ. Ěg tỹ tag to vãsãn tũ nĩn kỹ ěg pi(jé) ěg jóg mág venh ke mũ'. ¹⁵ Vėnh ki rĩr há han nĩ, ãjag kãmĩ ù tỹ Topě tỹ ěg jagãgtãn mũ tag to é he tũg jé. Ājag kãmĩ ùn pir tỹ vėnh jykre kórég to tar nĩn kỹ tóg ěg mỹ ti tỹ ùn e ag krĩn kónãn ha mẽ tĩ, ag tỹ ti jykre kórég ěn ri ke nỹtĩ jé. Kỹ tóg ěg jakré kãmĩ vãnh jagy ri ke nĩ. Ěg jakré kókég ti tĩ, vėnh jykre kórég tỹ ěg kókén ri ke. ¹⁶ Vėnh ki rĩr há han nĩ gé, ãjag kãmĩ ù tỹ Esáu jykre kórég ěn ri ke han tũ nĩ jé, ù tỹ Topě kato vãsãn tũ nĩ jé. Esáu vỹ Topě to é he ja nĩgtĩ, kỹ tóg vėjėn tugrĩn ã panh tỹ ti mỹ vĩ há han ke ěn kren. Ā jãvy mỹ tóg tovãnh, ti panh tỹ ti mỹ vĩ há han ke ěn ti, ã jėn ke pir tugrĩn mỹr. Ti tỹ ã panh tỹ ti mỹ vĩ há han ke ěn to é he hã vė. ¹⁷ Kar kỹ tóg mẽ sór ja nĩ, ti panh tỹ ti mỹ vĩ há han ke ti, hã ra tóg mẽg tũ nĩ sir. Kỹ tóg fỹ ja nĩgtĩ, ti panh tỹ ti mỹ vĩ há han jé, vãhã tóg ti

mỹ e nĩ ja nĩgtĩ, hã ra tóg sir rãké ja nỹ. Mẽg tũ tóg nĩ sir, ti panh tỹ ti mỹ vĩ há han ke ti. Tag ri ke han sór tũg nĩ.

Topê jũ tỹ jagy pẽ

¹⁸ Vãsỹ Topê vỹ ãg jóg'jóg ve ag mỹ ã jykre nĩm ja nĩgtĩ. Pãnónh tỹ Sinai tá ag tóg junjun ja nĩgtĩ. Pĩ ve ag tóg, tá, kỹ tóg tá kuty nĩ ja nĩgtĩ gé, kuty pẽ, kóho jũ ke gé. ¹⁹ Kỹ trombeta ãn vỹ kyr ja nĩgtĩ gé. Kỹ Topê vỹ ag mỹ vĩ ja nĩ gé. Ag tỹ ti vĩ mẽ kỹ ag tóg jũrũn ke ja nĩgtĩ, kỹ ag tóg ti mỹ to vĩ mũ, ti tỹ ag mỹ vēmén tũ nĩ jé, ti tỹ ag kãnhmỹ Moisés hã mré vēmén jé, ãgno ki. ²⁰ Ag mỹ tóg: “ãjag mẽg ù tỹ pãnónh tag rã hã jun kỹ ti tén nĩ,” he ja nĩ, “pó tỹ ti pin kỹ, ãjag krẽ ke gé, ãjag prũ fag ke gé, ãjag tỹ tá nén vég mũ kar ãn ti. Ti tỹ pãnónh tag vóg tugrĩn ti tén nĩ,” he ja tóg nĩ, Topê ti. Hã tóg ag mỹ e ja tĩgtĩ. ²¹ Topê tỹ ag mré vēmén kỹ tóg ag mỹ e tãvĩ nĩ ja nĩgtĩ, Moisés mré hã, hã kỹ tóg: “jũrũn ke inh, mũmẽg kỹ,” he mũ gé, Moisés ti.

²² Hã ra tóg ag tỹ nén ve ja ãn ri ke tũ nĩ, ãg tỹ ùri Topê rĩnja tá jun ke ti. Pãnónh ãn ri ke tũ ti nĩ, ãg tỹ kanhkã tá nén venh ke ti. ãg tỹ kanhkã tá jun ken kỹ ãg ter mãn ke tũ nĩ gé, ãg tỹ kanhkã tá pãnónh tỹ Sião he mũ ãn tá jun ken kỹ. Topê jamã tá ke vẽ, ùn rĩr mũ ãn jamã tá ke vẽ, hã vỹ: Jerusalém, he mũ, kanhkã tá cidade ãn ti. Topê tỹ jẽgnẽ jafã ag vỹ tá nỹtĩ. E tãvĩ ag nỹtĩ, e tãvĩ, ti tỹ jẽgnẽ jafã ag. Festa mág pẽ vẽ, tá. ²³ Kỹ Topê krẽ sanh kar ag vỹ tá nỹtĩnh ke mũ gé, ùn tỹ Jesus ki ge kỹ nỹtĩ ag kar. Ag jygy vỹ kanhkã tá rán kỹ nỹtĩ. Kỹ Topê vỹ tá nĩ gé, ù tỹ venh kar jykre tugnỹm ke ti. Kỹ ù tỹ ãg jo Topê ki ge kỹ nỹtĩ ag kuprĩg vỹ tá nỹtĩ gé, ù tỹ ãg jo

tá junjun mũ ãn ag. ²⁴ Kĩ Jesus vỹ tá nĩ gé, ù tỹ ãg mỹ vãnh jykre tãg nĩm mũ ãn ti, ù tỹ ãg jagfy ter mũ ãn ti, kỹ ãg tóg ti kyvénh tugrĩn jãnhkri nỹtĩ, Topẽ tỹ ãg mỹ vãnh pãte fón ti kỹ. Topẽ tỹ Abel kyvénh ven kỹ tóg jũ mũ, ù tỹ ti tén ja ãn to. Topẽ tỹ Jesus kyvénh ven kỹ tóg jãvo ãg mỹ vãnh pãte fón mũ. ãg tũn hã vẽ, Jesus tỹ ãg mỹ vãnh jykre nĩm jan hã vẽ, hã kỹ tóg Moisés jykre kãfór nĩ, Jesus ti.

²⁵ Hã kỹ jẽmẽ há han nĩ. Û tỹ ãjag mỹ Topẽ vỹ tó mũ ãn vỹ jẽmẽ há han sórmnĩ. ãg jóg'jóg ve ù ag vỹ Topẽ vỹ mẽ sór ja tũ nĩgtĩ, ti tỹ ag jyvẽn mũ ra. Hã kỹ ag krenkren ja tũ nĩ. Kỹ ãg krenkren ke tũ nĩ gé, ãg tỹ ù tỹ kanhkã tá nĩ ãn to ãg mré vẽnén sór mũ ãn vỹ jẽmẽ sór tũ nĩn kỹ, ti tỹ ãg jyvẽn mũ ti. ²⁶ Vãsỹ tóg, ã tỹ ãg jóg'jóg ve ag mré vẽnén kỹ tóg ga tỹ ragra ke han ja nĩgtĩ. Ûri tóg ãg mỹ tag tó, ha mẽ. “Ga tỹ ragra ke pir han mãn jé sóg ke mũ,” he tóg. “ãn kã kanhkã vỹ ragra ke mũ gé, ha vemnĩ,” he tóg. ²⁷ Ti tỹ: “ke pir han mãn jé sóg ke mũ,” hen kỹ ãg tóg ki kanhró nỹtĩ, ti tỹ ã tỹ nén han ja tag tỹ tũ! he sór mũ ti, ti tỹ ga tỹ ragra kenh ken ki. Nén ù tỹ ragra kenh ke tũ ãn hã tóg nĩnh ke mũ inhhã, hã vỹ: “Topẽ jamã, he mũ. ²⁸ Kỹ tóg há tĩ, ãg tỹ Topẽ mỹ: “há ti nĩ, ã tỹ ãg mỹ nén han mũ ti,” hen kỹ. ãg jamã tãg vỹ inhhã ragra kenh ke tũ pẽ nĩ, ti tỹ ãg mỹ ãg jamã nĩm ke ãn ti. Kỹ tóg há nĩnh mũ gé, ãg tỹ Topẽ rãnrãj han há han kỹ, ti tỹ ti mỹ sér nĩ jé. Ti kamẽg jé ãg tóg ke mũ gé, ãg tỹ tóg jũrũn kenh mũ. ²⁹ Topẽ vỹ pĩ tỹ nén ù kar kugprũg mũ ri ke nĩ.

Topê tỹ êg jyvẽn

¹ Jesus ki ge kỹ nỹtĩ ag tỹ jagnẽ to há nỹtĩ to krónh ke tũg nĩ. ² Ủ tỹ kuvar há tá ãjag to pasa ken kỹ ti mỹ: “inh mré jẽ,” hemnĩ. Ëg jo ke ã ag tóg, ag tỹ ã ag to: “inh mré nỹtĩ,” hen kỹ (ag tóg) Topê tỹ jẽnẽ jafã ag mỹ: “inh mré nỹtĩ,” he ja nĩgtĩ, ag tỹ ag ki kagtũg (hã) ra. Hã kỹ tag han nĩ. ³ Ủn sigse kỹ nỹtĩ ag ki rĩrmnĩ. ãjag tỹ kejẽn Jesus tigrĩn sigse kỹ nỹtĩnh ke tag mĩ êkrén nĩ, hã kỹ jagnẽ ki rĩr há han nĩ. Ag tỹ ãn vóg kónãn mũ ag ki rĩrmnĩ gé. Kejẽn ag tóg ãjag vóg kónãn ke mũ gé, Jesus tigrĩn, hã kỹ ag ki rĩr há han nĩ.

⁴ Ủ prũ fi to én tũg nĩ, ã mén to én tũg nĩ gé. ãjag prũ nỹtĩn kỹ ã fi mré nỹ sór tũg nĩ, ãjag mén nỹtĩn kỹ ã mré nỹ sór tũg nĩ gé. Topê vỹ ã tỹ vẽnh jykre kórég han (ka)mẽ ên ag to jũnh ke mũ, ã tỹ fag mré nỹ sór (ka)mẽ ên ag to, fag tỹ ag mré nỹ sór (ka)mẽ ên fag to ke gé.

⁵ Rico nỹtĩ sór tũg nĩ gé. ãjag tỹ nén vэг mũ ên vỹ há nĩ. Topê vỹ êg mỹ tag tó, ha mẽ: “ãjag kã jatũ henh ke tũ pẽ sóg nĩ, ãjag ki sóg rĩr nĩ nĩ,” he tóg, Topê ti. ⁶ Hã kỹ tag tómnĩ, ha mẽ: “êg jóg mág vỹ inh ki rĩr ke mũ,” hemnĩ. “Ti hã kamẽg isóg mũ. Ëprã ke ã vỹ inh vóg ke tũ pẽ nĩ, ti tỹ inh ki rĩr nĩn kỹ,” hemnĩ, Topê vĩ kri fi kỹ.

⁷ Ủ tỹ ãjag mỹ Topê vĩ tó vén mũ ên mĩ êkrén nĩ. Ga kri mũn kỹ ag tóg Topê tovãnh ja tũ pẽ nĩgtĩ, ãjag tỹ ti tovãnh tũ ra ag tóg kãgter ja nĩ. Ag ri ke han sórmnĩ, ti ki rã ên tovãnh sór tũg nĩ gé, ag ri ke han nĩ. ⁸ Jesus Cristo hã vỹ ter tũ nĩ. Ti tỹ vãsỹ nén to jykrén mũ ên hã han ti tĩ, ãri, kỹ tóg hã han mãn ke mũ gé. Tỹ ã han ke tũ ti nĩ, kỹ tóg kurã krỹg ja tũ nĩ

gé. ⁹ Ũ tỹ ón kỹ ãjag mỹ nén ũ ũ tó sór mũ ěn vĩ jẽmẽ tũg nĩ, ag tỹ ón kỹ Topẽ to nén ũ ũ tó mũ ra. ãjag krĩn kónãn jé ag tóg ke mũ. ãjag tỹ tỹ prãnh ke han sór jé ag tóg ke mũ. Topẽ vĩ ãjag tar han ki kanhró nĩ, ãjag jagãgtãn kỹ. Ũ tóg: “ã tỹ vễjẽn tag kon kỹ ã tóg Topẽ jykre to tar nĩ,” he tĩ. Ag ón vễ. Vễjẽn vĩ ěg tỹ ti jykre to tar nĩ han ke tũ pẽ nĩ. Topẽ hã ne ěg tar han ki kanhró nĩ'.

¹⁰ Ha mẽ, Moisés jykre ki Topẽ mỹ nén ũ pũn tĩ ag pi(jé) ěg mré Jesus jamĩn ěn konh ke mũ'. ¹¹ Ag tỹ Topẽ tũ ki rĩr tĩ to pã'i mág ěn vĩ ag mẽg ũ tãnh kỹ ti kyvénh ma tĩ tĩ, ag tỹ to: “Topẽ nĩgjafã,” he mũ ěn ra. Ti tỹ ag mẽg kyvénh ěn tỹ ěg tỹ Topẽ vĩ mranh mũ tỹ tũg' he sór vễ vễ. Hã ra ag tóg ãjag jamã jy ró pãnĩ to ag tóg ãjag mẽg tãnh kỹ pũn tĩ. ¹² Hã kỹ Jesus tóg cidade jy ró ěn pãnĩ to ter ja nĩ gé, ti tỹ ěg jagfỹ ter kỹ, ěg jãnhkri han jé. ¹³ Kỹ ěg tóg ti jagtar ri ke han ke mũ gé. Ũ tỹ ti ki ge jãvãnh ag jykre han tũ ěg tóg nĩ, kỹ ěg tóg ag mré han ke tũ nĩ gé. Jesus tỹ cidade jy ró pãnĩ to ter ja ěn mũ ěg tóg ěkrén kỹ nỹtĩ, kỹ ěg tóg ũ tỹ ti ki ge tũ ag mré ag jykre han ke tũ pẽ nĩ. ¹⁴ Tag ki, ga kri ěg tóg ěg jamã pẽ venh ke tũ nĩ. Kanhkã tá ěg tóg ve sór mũ, ěg jamã ti.

¹⁵ ěg tỹ Jesus tugrĩn Topẽ mỹ vĩ há han kỹ tóg há tĩ. ěg tỹ nén vég mũ kar to ěg tóg ti mỹ: “ẽg mỹ tóg há tĩ, ěg mỹ tóg sér tĩ,” henh ke mũ. ěg tỹ ti mỹ nén ũ pũn mũ ri ke tóg nĩ, presente ri ke tóg nĩ, ěg vĩ tag. “Ěg jóg vễ,” he jé ěg tóg ke mũ gé, ti to. Ti mỹ vĩ há han ke to krónh ke tũg nĩ. ¹⁶ Jagnẽ ki rĩrmnĩ gé, jagnẽ mré nén kar han kỹ. Tag to krónh ke tũg nĩ gé. ěg tỹ Topẽ mỹ nén ũ pũn ri ke ti nĩ, ěg tỹ ti mỹ

presente han ri ke ti nĩ, ěg tỹ jagně ki rĩr tĩ ti, kỹ tóg ti mỹ sér tĩ.

¹⁷ Ů tỹ ājag kanhrān tĩ ěn ag vĩ jēmēmnĩ, ag tỹ ājag mỹ nén tó mũ ěn ki króm nĩ. Ājag ki rĩr ag tóg nĩgtĩ, ājag tỹ Topě tovānh tũ nĩ jé, kỹ Topě vỹ ag rānrāj tugnỹm ke mũ. Ājag tỹ ag vĩ jēmēn kỹ tóg ag mỹ kufy tũ nĩnh mũ, ag rānrāj ti, kỹ tóg ag mỹ sér tĩnh mũ. Ti tỹ ag mỹ kufy nĩn kỹ tóg há tũ nĩ gé, ājag mỹ.

Ěg tỹ Topě mré vēmén ke

¹⁸ Inh jagfỹ Topě mré vēmén nĩ. Nén ũ kórég han ja tũ inh nĩ, ki kanhró sóg nĩ. Isỹ nén ũ kuryj han sór vě mỹr, tag hā to sóg jykrén tĩ. ¹⁹ Kỹ inh jagfỹ Topě mré vēmén nĩ, Topě tỹ kānhmar ājag to inh jěně mǎn jé. Ti mỹ tag to vĩn kỹ krónh ke tũg nĩ.

²⁰ Topě mré sóg vēmén tĩ ājag to. Ěg krĩ kuprāg ti tĩ. Kỹ tóg Jesus ti, ěg Senhor ti rĩn mǎn ja (ti) nĩ gé, ti tỹ ěg jagfỹ ter kar kỹ. Ěg jagfỹ ter kỹ tóg ũ tỹ mé ki rĩr tĩ ěn ri ke nĩ, hā ra tóg ěn kǎfór nĩ gé, ti tỹ ěg ki rĩr há han nĩn kỹ. Ěg jagfỹ ter kỹ tóg ěg mỹ věnh jykre tǎg ěn nĩm ja nĩ, ũ tỹ tũ' he vānh ěn. ²¹ Topě hā mỹ sóg to vĩ mũ, ti tỹ ājag tar han jé, ājag tỹ nén (ũ) tỹ ti mỹ há nĩ ěn hā han jé. Ti há vỹ Jesus Cristo mỹ: “ag tar han nĩ,” he ja nĩ. Ti hā mỹ ěg tóg vĩ há han ke mũ, Jesus Cristo mỹ, kỹ tóg tũ' henh ke tũ nĩ, ěg tỹ ti mỹ vĩ há han ke ti. Amém.

²² Inh kanhkā, sỹ ājag mỹ tag tó sór ja vě. Jatun mỹ mẽ sórmnĩ, sỹ ājag jyvěn mũ tag. Inh pi(jé) věnh ránrán mág han. Věnh ránrán sĩ han sóg ājag mỹ.

²³ Ha mẽ, ěg régre tỹ Timóteo vỹ se kỹ jě mǎn tũ nĩ ha. Ti kava ag huri. Ti tỹ kānhmar ki jun kỹ tóg inh mré ājag venh kǎtĩg ke mũ.

²⁴ Ājag pã'i kar ag mĩ sóg ěkrég tĩ, Topě ki ge kŷ nŷtĩ kar ag mĩ ke gé. Tag ki ke ag, ga tŷ Itália ki Topě ki ge kŷ nŷtĩ ag vŷ Ājag mĩ ěkrég tĩ gé.

²⁵ Topě jé Ājag tar han kãn.

Hã vĕ.

Topẽ vĩ rá **New Testament in Kaingang (BR:kgp:Kaingang)**

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 21 Feb 2024 from source files
dated 29 Jan 2022
16af52c8-0e45-5e91-b36c-cd314d36d7fc